



ثلاث مسرحيات

من فصل واحد

تأليف

الاستاذ محمود نجور بك

مقدمة

بقلم الأستاذ محمد صمدى

رأيت أن يكون هذا الكتاب لتيমور بك ، هو أول
الكتب الأربعة التى قررت إدارة «الحوادث» طبعها وإهداءها
لمشركيها ، وذلك لسببين :

الأول هو « شخصية المؤلف » . فتيمور بك من أحب
أدباء العربية إلى جماهير القراء ومن أقربهم إلى قلوبهم ، وقد
عقد له منذ سنوات لواء « القصة العربية الفنية » واعترف له
بذلك النقاد والمستشرقون . وكلما أراد كاتب أجنبي أن يؤرخ
أو يحلل « القصة المصرية الفنية » لم يجد سوى مجموعات تيمور ،
ينقل منها إلى لغته ، ويأخذ الأصول التى روعيت فى وضعها
على أنها « الأصول المتبعة فى القصة العربية القصيرة »

وقصص تيمور تغلب عليها النزعة التحليلية الوصفية ، ولذلك

تظهر « شخصياتها » بوضوح تام ، وليس على القارئ أن يستنتج لنفسه شيئاً ، اللهم إلا « العوامل النفسية » التي حدث « بالبطل » إلى أن ينتهي تلك النهاية التي أرادها له المؤلف وصاغها — بمهارة — في بضع كلمات !

وسيجد القارئ عند مطالعة أول « مجموعة قصص تمثيلية » لتيمنور ، أن سائر مميزات « المسرحية الفنية » قد توافرت لها . فهي جميعاً ذات حبكة ، وحادث ، وشخصيات محددة المعالم ، وحوار قل أن يجاريه فيه قصصى آخر .

والسبب الثاني هو جودة الأسلوب واللغة التي عالج بها المؤلف آراءه . وإذا كانت هذه أول مرة يعالج فيها محمود تيمنور « المسرحية » فلا ريب لدينا في أنه جدير بكل تهنئة ، لأن توفيقه فيها لا يقل عن توفيقه في القصص القصيرة وإن كان طابع الهدوء و « قلة الشخصيات » يغلب عليها .

وقد رأى تيمنور أن يكون الحوار في مسرحياته هذه ، باللغة العامية الدارجة ، لسبب وجيه ، هو أن المسرحية ينبغي — في كل تفاصيلها — أن تكون صورة « صادقة » للحياة التي تصورها . واللغة الدارجة هي لغة الحوار عندنا . هي اللغة التي نتحدث بها ونتخاطب ، وإن كان « الأسلوب » في طبقة يختلف عنه في طبقة أخرى . فإذا كان الأمر كذلك ، فلماذا

لا نكتب الحوار كما ننطقه ، ولماذا لا نضع «قواعد إملائية»
لهذه اللغة الدارجة ، بحيث لا نضطر إلى استعمال حروف
« غير دارجة » في مكان الحروف الدارجة كالقاف في مكان
الهمزة مثلاً ؟

فكتابنا من هذه الناحية يعتبر «معجماً في إملاء اللغة الدارجة»
لم يسبق نشر مثله من قبل .

ولا شك أن إدارة العدد الشهري من « الحوادث »
بإصدارها هذا الكتاب ، في هذه الحلة القشبية وفي هذا الشكل
المبتكر ، والطباعة الأنيقة - تكون قد ضحت في سبيل مشتركيها
تضحية جسيمة ، نظراً لارتفاع أثمان الورق وخامات الطباعة
ارتفاعاً وصل في بعضها إلى عشرة أمثال ثمنه قبل الحرب .
ولكن الصداقة لا تكتسب - عادة - بغير تضحية . ونحن
رؤيد صداقة القراء ، ونبدل في سبيلها كل ما نستطيع .

محمد صمري




الصَّحَاحُ
كُوسِيْدِيَّةٌ مِنْ فَصْلِ وَاحِدٍ

أشخاص الزوایة

ومبرة هانم : عمرها ٣٠ سنة

مدیر أفیری : عمره ٣٥ سنة

حسن البربری : فراش بالمنزل



المنظر هو استقبال بمنزل وحيدة
هانم، يدل مظهره على غنى وترف .
وحيدة جالسة جلسة استرخاء على
المنسكأ ، تدخن وتصفح مجلات
الأزياء في إهمال . هي سيدة غير
متزوجة، جذابة ، تعيش وفق هواها .
ملابسها غاية في الأناقة ، وحسن
الدوق . الوقت قبيل الغروب ...

وحيدة هانم : (تسمع دقا بالباب . تقول :) ادخل ...!
(لا ترفع نظرها عن مجلة الأزياء . يدخل حسن الفراش ،
ويقف متردداً ...)

وحيدة هانم : (بعد حين، وقد رفعت بصرها عن المجلة)
عاوز إيه ... ؟

حسن : يا فندم بس ... بس ...

وحيدة هانم : عجيبه ... ما تقول يا راجل عاوز إيه ؟
حسن : (في تزد ويطء) يا فندم ... دردير أفندی
يره ، و ...

وحيدة هانم : (تقاطعها في شدة وغضب) دردير أفندی
يره ؟... أنا مش منبه عليك إنه لوّ جّه تطرده على طول ؟ ...
حسن : منبه علىّ يا فندم ... بس هو كان ع ...

وحيدة هانم : (مقاطعة إياه) ما تطولشي ، إنت اللي
حتنطرد ، ما دام مش آدر تنفذ أوامري ... يا الله ... إمشي ... !!
حسن : يا فندم ربنا يطول عمرک ، أنا والله مش محتوء
أبدأ ، إلخا على دردير أفندی اللي ...

وحيدة هانم : (وقد اشتد غضبها) بؤلك إمشي بره ...
(يفتح الباب في هذه اللحظة ويدخل دردير أفندی .
فتی أسمر دمیم ، ولكنه أنيق الملبس ، خفيف الحرکة ، دائم
البشر ، سريع النکته ، يدخل في حذر ، وهو مطأطيء
الرأس ، ويقف ذليلا بجوار الباب . ينظر إليه حسن

الفراش نظرات نائرة ، ويمسكه ويدفع به نحو الباب . يقع
طربوش دردير أفندی على الأرض ...)

حسن : إنت جيت النهارده علشان تنقطع عيشنا ؟ يا الله على بره !!
دردير أفندی : (لحسن الفراش) أنا طالع . طالع .
سبيني يا أخى ... (لوحيدة هانم) بس دي روحية هانم بعثاني
مخصوص في كلمة واحدة ... !

وحيدة هانم : روحية هانم ؟ ... إيه الكلام الفارغ دا ... ؟
دردير أفندی : والله ذى عاوزه تفهمك على مسألة الفلوس
الى استلقتم منك ...

وحيدة هانم (وهى ما تزال غاضبة نائرة) : فلوس ؟
فلوس إيه ؟ إمشى بره بلا كلام فارغ ... !

دردير أفندی : ياستى دى كلمة واحدة ، وبعدها خارج على
طول . الفلوس حتردهم على دايير ملیم ... ! (لحسن الفراش
وهو ما يزال آخذاً بخناقه) يا أخى سبيني خلينى انكلم ...
الكلمة بتؤف فى ظورى ... !!

وحيدة هانم : طيب سيبه يا حسن ، سيبه ... لما أشوف
تآخرتها إيه معاه ... !

(حسن الفراش يترك دردير أفندی ، ويخرج ...)

دردیر أفندی یسوی هندامه . يتناول طربوشه من
الأرض ويمسحه بكمه ثم يضعه على رأسه ...)

وحيدة هانم : إيه ؟ ما تتكلم ... بتقول إن روحية هانم
حترد القلوس ... ؟

دردیر أفندی : على دایر ملیم ، وحياء راسك الغالية ... !
وحيدة هانم : ولكن إمتة ؟ إمتة ؟
دردیر أفندی : وهى دى المعضلة ؟

وحيدة هانم : معضلة ؟ إنت جاي علشان تؤلى إن دى معضلة ؟

دردیر أفندی : یاستی حلمك شويه ، خلى أفهمك برواءة !!
وحيدة هانم : أنا رايته أوى ... اتفضل أول ...

دردیر أفندی : بأ سعادتك تعرفى ان روحية هانم ...
یعنى الیومین دول ... أصدى أءول إنها مزنوءة شوية ... !!

وحيدة هانم : آه ... فهمت ، فهمت ! إنت عامللى حكاية
روحية هانم سلّم ، علشان ما آهلك ... إنما حيلتك اتفضحت ...
اخرج بره ... بره على طول ... !!

دردیر أفندی : أيوه ... بس ...

وحيدة هانم : ما بسش ... إزای تفتكر إني أأبل اشوفك
فى بقی بعد اللي صدر منك امبارح ؟ انت منتش عارف إني
طردتك من هنا وحرمت عليك تعتب باب بقی ... ؟

دردیر أفندی : (مطأطىء الرأس بصوت ذليل) عارف اا :
وحيدة هانم : ومادام عارف إزای تجاسر ، وتظهر
أدای ؟ یعنی عازني أجيب لك البوليس علشان يطلعك ؟
دردیر أفندی : أنا طالع من نفسى وحياة راسك ... إنما
بس بدى أول ...

وحيدة هانم : تقول إيه بعد اللى صدر منك امبارح ،
يا بارد يا دون يا سافل ... انت ناسى ألت إيه ... ؟
دردیر أفندی : كنت سكران يا هانم ... والسكران برضه
معزور ...

وحيدة هانم : سكران في عينك وعين أبوك ، راجل أليل
الحيا ماتحتشيش ... فاهم إني أأهلك في بيتي بعد الفضيحة اللى
سببتها لى ؟

دردیر أفندی : فضيحة ؟ ! الشر بره ... ياريتنى كنت
اتحرأت وادّريت في الهوا ! !

وحيدة هانم : تقول بأعلى حسك في الحفلة ، أدام
الستات كلهم ، إنك بضحى وعاوز تبوسنى ؟ أطع لسانك ! ...
مش نائص إلا انت اللى تحبى ... الراجل المسخه اللى بيدحكوا
عليه الناس ... الصعلوك المتشرد اللى مش لاقى بيت يلمه ... ؟
دردیر أفندی : صحيح مسخه ومتشرد وأكتر من كده ،
ولكن كان أنا خدامك برضه . اشتمينى ، اضربينى ، اطردينى .

إعلمي في كل اللي عاوزاه ... بس حاجة واحدة عاوزها
منك ، خللى ألبك شوية راضي على ... !!

وحيدة هانم : أنا أرضى عليك بعد زنبك الكبير دا ؟
دردير أفندي : كل ما كان الزنب كبير ، كل ما كان
الصفح أعظم ... تعرفي يا وحيدة هانم ، والله ، وحياتك
الغالية عندي ، إني امبارح ما كنت عارف راسي من رجلى ...
أنت إيه ؟ عملت إيه ؟ كل دا زى الحلم الملمخبط ... يا سلام !
بأ أنا أأبل على نفسي إني أهينك ؟ دانق سقى وتاج راسي ... !
أنا أنسى معروفك ؟ أنا أنسى عطفك ؟ (يصمت قليلا ثم يرفع
بصره إليها ، ويقول في لهجة استعطاف شديدة ...)
أنا أنسى رحمتك ؟ !

وحيدة هانم : (وقد عادت إلى المتكأ ، وجلست
عليه ، وجعلت تهز قدمها ، وبدأت تحدثها تنناقص ...)
رحمتي ... ما عنديش رحمة ؟ !

دردير أفندي : (يقترب منها على مهل وهو يتنسم
ابتسامة الذل والضعة) والله إنت كلك رحمة وطيبه ورثته !
ومستحيل ألبك يفضب على واحد من محاسبيك ...
وحيدة هانم : (وهى تدخن) ما تزودش في الكلام من
غير فائدة ...

دردیر أفندی : (يجلس على الأرض بالقرب من قدميها) .
إنت نسيتي يا وحيدة هانم إخلاصی الكبير لك ؟ نسيتي اللي
ضحيتہ علشانك ؟ نسيتي مره لما دافعت عنك وبهدلت اللي اتكلم
في حقك ، فكان نصيبي اني انضربت وانبطحت وانسجنت ؟
نسيتي لما كانوا حاي موتوني السنه اللي فاتت في الصعيد وأت
ما كلفتيني بالمأمرية إياها ؟ ياسلام يا وحيدة هانم . . . تنسى كل
دا علشان غلطة واحدة ؟ غلطة واحدة صدرت مني من
غير أصد . . . ؟

وحيدة هانم : غلطة فظيعة . . . ما تنسيتش أبداً ؟ . . .
دردیر أفندی : جنب اللي عملته كله ما تنسيتش أبداً ؟ !
معلمش . . . إنما أحلف لك تلاته بالله العظيم إنك لو دورتي
في الدنيا كلها عن واحد زي في إخلاصی واحترامی وتقاني
في خدمتك ، والله ما انتي لإنيه أبداً . . . إنتي مش عارفة إيمتي
دلواتي ، لكن بعد موتی لما ماتلايينيش أدّامك حتزل الدموع
من عينيكي ، وتثولي : الله يرحمك يادردیر ! والله ضحككتني
كثير ، وسليتني كثير ، مين حلائي دلواتي يضحكتني ويسليني
وحيدة هانم : (وهي ترسل دخان اللهافة في إهمال)
بيه ؟ ... المدحكاتيه كثير ... !

دردیر أفندی : كثير صحيح ، إنما مش زي ، مستحيل
تلائي واحد يملأ محلي . . . ياسلام ! تلائي واحد يملأ محلي ؟ ..

تتلائي واحد زني؟ ... يخطر على بالك الخاطر ده ...؟

(يعني وهو يتلوى ، ويشكل وجهه أشكالاً مختلفة)

فين هوّ اللي في خفّافتي فين هوّ ياسلام !؟

دردير دا أد الدنيا دردير دا واد تمام !

ودلوقت بأعوزه أولك إيه؟ ... عندي أخبار الدنيا والآخرة

وحيدة هانم : (وقد زالت حدتها كل الزوال) فاكّر

.. يعني إني صفحت عنك ...

دردير أفندي : (وهو مسترسل في كلامه) أخبار ياسقي

من كل لون ... سينما ، تياترو ، جواز ، طلاء ، سبأ ، خناات

عائليه ، أزومات سياسية ، تفليسات ماليه ، جر شكل على كل

صنف ... كل شيء عندي ... كل شيء . أنا السفيرة عزيزة ،

أنا الراديو ، أنا تلفراف آخر ساعة ... اطلبي مني اللي عازاه .

على فكره ، ماسمعتيش حاجه عن زكيه هانم ...؟

وحيدة هانم : (ترمي اليه لمافة وتقول في إهمال) مالها؟

دردير أفندي : (يلتقط اللقافة في حركة بهلوانية ويقبلها

علامة الخضوع ، ثم يشعلها ويقول :)

— مالها ازاي ؟ مش اطلّيت ؟ !

وحيدة هانم : بلاش كلام فارغ !!

دردیر أفندی : طیب وحیاء راس أبویا الغالی اللى ما حلفت
بیه باطل أبدا إن الخبر دا صحیح ... !!
وحیده هانم : یاخی تنقطع راسک علی راس أبوک ...
دردیر أفندی : إن شاء الله ... إزا ما کنتیش مسدأه ،
التلیفون آر یب !!

وحیده هانم : إزای دا ؟
دردیر أفندی : دى حکایه يطول شرحها ، إنما أدر
ألخصها لك فى ثلاث کلمات . نظرة ، فایسامة ، فکلام ... إلى
آخره ... والله یرحم اللى آلهآ ... !!

وحیده هانم : ایه یا واد الکلام الهلس دا ... ؟!
دردیر أفندی : دا کلام هلس برضه ؟ یاستی الحب من أول
نظره ! اتی ماتش عارفه ان العلاقات البیلوماسیه کانت متوترة
بینها وبين جوزها علشان الواد المسخوط حسنی ؟ ! الله بأه ،
انت عاوزه یعنى نقتش أسرار العائلات ؟ !
وحیده هانم : (فى إهمال) إنما عجبها إیه فى الواد حسنی
دا ؟ ما یستاهلش الظیطه دى أبدا ؟ ! ...

دردیر أفندی : ولد مفعوص لا طلع ولا نزل ، والآنکت
من کده لما تسمعیه یتکلم ، یفضل یتهمته ویتف وینف یمجرى
أدامه بلد ... إنما یاستی الشهادة لله ، جیبه معمر ، تملی ملیان
وحیده هانم : وهو الحب دخل ولا خرج فى الجیب
یا مغفل ؟ !

دردیر أفندی : والله یاسقی برضه مافیش مانع یکون فيه
اتصال بین الاثنين ... إنما احنا مش فی الحکایة دي ، إحنا فی
حکایه أهم ... !!

وحیدة هانم : حکایة إيه ؟

دردیر أفندی : حکایة محسوبک ...

وحیدة هانم : انت ؟

دردیر أفندی : ذا طلب بسیط ... !

وحیدة هانم : وایه هو یا بارد ؟

دردیر أفندی : هو انک تضر بیني کام ألم سخنین علی اصداغی .

والله جد ، انت بتفتکری انی باضحک ؟ ... إنما بشرط یکونوا

ألام طیبه من اللى بالك فیهم ... اصداغی بتاکفی ، نفسی

أکل علاه منك ... (وحیدة هانم تضحک) هاتی إیدک ...

والله الا ضاربانی ، وحیة راسک یا وحیدة هانم مانی متّعتع من

الحّنة دی ، الا بعد ما انضرب من إیدک الحلوة دی ... یالله ...

(تمدّیدها وهی تضحک ... وتأخذ فی صفعه صفعات

خفیفه ... مازالت مسترسلة فی الضحک ... دردیر أفندی

یحتج قائلاً :)

لا . لا . لا . دا مش ضرب دا یاسقی . عاوز علاه جامدة علی

اصداغی ... بالأوی ، بالأوی ... لأ ، إنت لسه برضه ألبک

حينئذ علي ؟ إيدك مش مطاوعا كي ... !!؟
وحيدة هانم : ولكن اطلّيت صحيح ؟ اطلّيت خلاص
زكية هانم ؟

دردير أفندي : وشارعة في الجواز من جديد !
وحيدة هانم : من حسنى ؟ ... ما تؤلّشي كده !
دردير أفندي : وليه لأ ؟ ... ودلوأتى ما تسمجيش أروح
أوصى حسن الفراش على فنجان أهوه أعمر ييه دماغى الخربانة ؟!
وحيدة هانم : روح فى داهيه ... !!

دردير أفندي : (وهو خارج يتكلم كالنساء البلديات
مقلداً لهجتهن ...) الله بطول عمرك يا وحيدة هانم ، ويطرح
فيك البركة بجاه النبي وأهل بيته ... !

(وحيدة هانم مستغرقة فى الضحك ... لا يكاد
يصل دردير أفندي إلى الباب حتى يصيح قائلاً :)
يا حسن يا فراش يا غبي ! فنجان أهوه مذبوط لسيدك دردير
بيه حالا ... يا ولد حالا ...

(يعود دردير أفندي ، ويجلس فى موضعه السابق ،
تحت أقدامها ... وحيدة هانم تتمدد على المتكأ ... الظلام
ينجم على الحجرة ، ولكن نور القمر يظهر وينمر المتكأ

وما يجاوره ، فيرى المتفرجون وحيدة هانم ودردير
أفندي بوضوح تام ... دردير أفندي يسند ظهره إلى
كرسى ، ويروى أخباره كأنه تلميذ يقرأ درساً محفوظاً
عن ظهر قلب ...) أمين بيه خسر في السبأ خمسين جنيهه ،
ومراته اشترت بخمسين جنيهه تانية البالطو القرو العظيم اللي
جه موديل عند مدام سيريز الحياطة ... عثمان بيه أبو خفاجه
اشترى رديو وركبه في بيته اللي في المتيا ، ولما صبح الصبح
لآه اتسراً ... تحية هانم سافرت أوروبا علشان تدور لبنتها على
عريس بين الشبان الوارسين المصيفين في فيشى وكارلسباد .
جمعية الشبان الوارسين اللي على شفا الافلاس ، ناوية تطبع آيمة
بأسماء أعضائها وألقاب الشرف اللي حازها كل واحد منهم ،
وتوزع الآيمة على فتيان الطبقة الراقية وغير الراقية ، لعل
وعسى ...! محسوبك فصّل بدلة جديدة شيك خالص ، وانق
ما تنش واخذه بالك منها ... الكرافت اللي كان لابسه عباس
بيه ليلة امبارح أوّم الكيت كات على رجل ... أطر المفتخر
اتآخر خمس دآني النهارده عن ميعاده ... سنية هانم بنت
عبد الغفور بيه اتخطبت لفؤاد زناتي ... والعاقبة عندنا في
المسرات ...!

(يتمطى دردير أفندي ، ويتشاءب طويلاً)

وحيدة هانم : (وهي مغمضة العينين، وبصوت هادىء)
خلاص ... !!

دردير أفندى : تأريياً...! (الصمت يخيم عليهما هذبة ،
يعود بمدها دردير أفندي إلى الكلام فيقول في إهمال بصوت
غير مرتفع) فاضل خبر بسيط ، خبر تافه ... عاوزه تسمعيه ؟
وحيدة هانم : أول ... !

دردير أفندى : محسوبك كسب ألف جنيه ... !
وحيدة هانم : (وهي على حالها السابق) بثول إيه ؟ !
دردير أفندى : (بصوت أعلى) بثول محسوبك كسب /
نمرة المواساة السكندو ... !!

وحيدة هانم : (ترفع رأسها وتنظر إليه ، فتجده يدخن
لقافة في إهمال ، وهو مغمض العينين) مين هو اللي
كسب نمرة المواساة السكندو ؟

دردير أفندى : (وهو على حاله لم يغير الوضع الذى
كان عليه) حضرتى !

وحيدة هانم : (وقد انتهت كل الانتباه) انت كسبت
نمرة المواساة ... ؟

دردیر أفندی : (وقد رفع جفنيه شيئا ، ولكنه لم يغير
جلسته) يدي سره لأضعف خلؤه ...

وحيدة هانم : انت بتتكلم جد ولا تهزر ... ؟
دردیر أفندی : وبهزر ليه بس ؟ والله العظيم كسبت نمرة
المواساة السكندو وإيمتها ألف جنيه ...

وحيدة هانم : يا ابن الايه ... ألف جنيه مرة واحدة .. ؟
دردیر أفندی : ألف أهيف ...
وحيدة هانم : والله مش مصداه برضه ؟
دردیر أفندی : ما فيش حاجه ، الفلوس في جيبى وأدر
أوريها لك .

وحيدة هانم : طيب وريها لى ...
دردیر أفندی : (يخرج من جيبه رزمة أوراق مالية
قيمة كل منها مائة جنيه ، ويعدها أمامها ورقة ورقة قائلا)
مية ، متين ، تلتميه . (وهكذا إلى أن يصل إلى الألف)
صدأت بأه ... ؟

وحيدة هانم : أما حظ صحيح ، ولكن جيت هنا راكب إيه ؟
دردیر أفندی : راكب إيه ؟ الترامواي !
وحيدة هانم : ما خفتش لحد يسراك ؟

دردیر أفندی : یسرانی ؟ وهو أنا وش غني، دامكتوب
على سحتي بالسلس : الفأر حشمة ...

وحيدة هانم : ولكن ما ألتليش على الخبر دا من الأول ليه؟

دردیر أفندی : حاجه كبيره أوى يعنى ؟

وحيدة هانم : لثيم !!

دردیر أفندی : يعنى أنا ما كسبتش أبل كده من الأمار

ومن السبأ ميّات من الجنّيات ...؟

وحيدة هانم : صحيح ... إنما ما وصلتش للآلف ...!

دردیر أفندی : الميّات عندي توازي الألف وحياة راسك.

كله بيدخل جيبى ويخرج منه من غير ما ألتسه انت راج

فين ؟ ... فلوس !! فلوس إيه ياسق ؟ على الجزمة إانت فاكرة

العشرين جنيه اللى اتبرعت بهم للجمعية الخيرية من مدة شهرين ؟

وحيدة هانم : فاكرة تمام ... وبعدها يومين ما كانش

عندك حأ السجائر !

دردیر أفندی : ومع ذلك جرى إيه ؟ أهو برضه عشت

أربعة وعشرين إرباط ... وربنا يخلي بيتك مفتوح للى زى ..

سيبك ياسق وخليها على الله ...!

وحيدة هانم : إانت مصيبة ...!

دردیر أفندی : يسلم بؤك ... ! تعرفي حصرف الآلف

دول (يضرب جيبه بيده) فى أد إيه ؟

وحيدة هانم : في كام شهر ...؟!!

دردير أفندی : في ليلة واحدة !

وحيدة هانم : (في دهشة كبيرة) ليلة واحدة؟!!

دردير أفندی : وربّي اللّی خلّاني الا مضیتّهم في ليله

واحدة !!

وحيدة هانم : انت والله حتخليني انزل عليك ضرب

صحيح ...!

دردير أفندی : (في فرح واستسلام) ياربت !!

وحيدة هانم : ياراجل انت مش حتعال أبدأ؟! يعني مايحبش

في بالك تنسني لك حاجه تنفعك؟ مثلاً تشتريك كام فدان؟ تشارك

على بيت !

دردير أفندی : (ينفجر ضاحكاً ، مقاطعاً إياها ، ويستمر

يضحك وقتاً ، وقد وضع يده على بطنه من شدة الضحك)

الله يخليكي ، عاوزاني أباً من ذوى الأملاك...؟ (ينتفخ في

جلسته ويقول في كبرياء) دردير من ذوى الاملاك ! (يندفع

ثانياً ضاحكاً) الشر به ، هو كان جرى إيه في الدنيا؟ (يصمت

قليلاً ثم يقول) دردير ذا حيفضل طول حياته دردير المجنون

المضحك أني اللي ساكن في درب الألي . (يتهدد طويلاً ثم يقول) آه يا وحيدة هانم ، إنتِ عمرك ما حتفهميني أبداً ١٠٠ وحيدة هانم : أفهمك ازاي ، وانت لغز ؟ !
 دردیر أفندي : لا والله أبداً ، أنا مش لغز ، إذا كنت بتحس باللي بحس بيه كنتِ فهمتيني من زمان !
 وحيدة هانم : وإيه اللي بتحس بيه سعادتك ؟
 دردیر أفندي : (في اشمزاز شديد) بحس بكرة شديد للعالم دا ... !

وحيدة هانم : إيه ؟
 دردیر أفندي : ليه ؟ (في سخرية وألم) وعيشتي دي : عيشة الصعلكة والتهريج ا عيشة بتوع رمز ... ! ولكن إيه رأيك في سحتي !

وحيدة هانم : (في شيء من التخابث) مالها ا مش بطاله دردیر أفندي : مش بطاله ؟ الله يحفظك ! تصدقني يا وحيدة هانم ، ربنا سبحانه وتعالى مش خلاقي ، دا شلفطني ، والله شلفطني . ولكن الواحد حيثول إيه ؟ حكمتك برضه يارب ..
 (ينكس رأسه فترة ، ثم يرفعه ، وهو يحدق في وحيدة هانم)
 تعرفي إزاي صرفت الميت جنيه اللي كسبتهم من السبأ الشهر اللي فات ... ؟

وحيدة هانم : سمعت إنك أعدت بهم جمعة في هاليوبوليس
بالاس ...

دردير أفندي : دؤت في الجمعة دى صحيح طعم العظمة ،
والنخفخه والتزير ...

وحيدة هانم : وبعدها رجعت على درب الأليلى ...!
دردير أفندي : واتقديت عند المعلم عبده المخللاتى ...!
وحيدة هانم : مش كنت تئدر تعيش بالميت جنيسه دول
عيشه كويسه مدة شهرين والا ثلاثة ؟

دردير أفندي : غيرى يئدر يعيش بيهم سنة ، وأكثر من
سنة كان ، ولكن دى عيشة بهائم فى نظرى ... هى الحياة معناها
إيه يا وحيدة هانم ..؟

وحيدة هانم : معناها الواحد يعيش فيها عيشة كويسة ...!
دردير أفندي : معناها عندى أنا إني أدوء حلوها ومرها ،
أدوء غناها وفارها ... أدوء عظمتها وسفالتها ... أمرمغ
نفسى فى الطين بتاعها ، وبعدين أطلع لغاية إمتها ... أهى دى
الحياة اللي أنا عرفها وعاز أعيشها طول عمرى فى الدنيا دى ...
وحيدة هانم : والله انت يادردير ما فيش بينك وبين المرستان
غير خطوتين اتنين ...

دردير أفندي : صدأتى ...
وحيدة هانم : ولكن ما التليش ... حتصرف الألف

جنیه فی لیلة واحدة ازای ...!؟

دردیر أفندی : أصر فها ازای فی لیلة واحدة ؟! ...
یا سلام ! شیء صعب أوی ...!؟ ... إدتني مليون جنیه ، وأنا
أوریکي ازای (يجذب تقسا بغمه فی حركة سريعة) بروح
فی أأل من لیلة ؟! عزومة هائلة ، بوکر ، شبانيسا ، نسوان
فيه حاجة تضیع الفلوس أد النسوان ؟! ... لا مؤاخزة ...!
وحيدة هانم : اتلهی علی عينک ...!

(بصمتان ، وحيدة هانم تتمدد علی المتسک كما كانت
قبلا . دردیر أفندی يتمدد تحت أقدامها . یمكنان هکذا
وقتا وهما یدخان)

دردیر أفندی : (یقطع الصمت فی لهجة إهمال) علی فكرة ،
ما سمعتیش عن واحدة اسمها « لولیت »
وحيدة هانم : (فی إهمال کبیر) مش فاکرة ، وتبأ إيه
لولیت دی ؟!

دردیر أفندی : رفیئة البرنسات والملوک ...!

وحيدة هانم : (بعد صمت قليل) جمیلة ...!؟

دردیر أفندی : ما فیش بعد کده خفه ولا جمال ولا شیا کة !
وحيدة هانم : یعنی شفتها ...؟

دردیر أفندی : و کلمتها ...!!

وحيدة هانم : غور ...!

دردیر أفندی : وعندی معاد معاها الليلة ...!!

وحيدة هانم : اتلهی ...!

دردیر أفندی : ولیه یعنی اتلهی ، والمحفظة بتاعی عمرانة

بألف جنیه ...؟ آهم الألف جنیه دول حیرحو عليها کاهم

لآخر ملیم ...!

وحيدة هانم : صحیح راجل مجنون ...!

دردیر أفندی : المجنون هو الی یكون عنده فلوس وما یمتعش

نفسه بواحدة زی دی ...!

وحيدة هانم : تصرف یاراجل ألف جنیه علی لولیت فی لیلۃ

واحدة ...؟! دی لازم تكون لولیت دی واحدة حسنہا

ما یوصفش ... واحدة واحدة عألك كله ...!!

دردیر أفندی . (بعد صمت یتکلم و كأنه یحلم) حسنہا

ما یوصفش ...! تعرفی جزمتهك انی تساوی ألف واحدة

زی لولیت ...!

وحيدة هانم : (تجیبه و كأنها هی أيضا تحلم) یا سلام

أد کده ؟!

دردیر أفندی : مش مصدا نی ...؟

وحيدة هانم : کلام فارغ ...؟

دردیر أفندی : بأ أنا كذاب ؟ (وقد بدأ يتحمس)
أنا لو خلتني اتكلم ، لسمعتك حاجات ما تخطر شئ على بالك ...
(بصمت كلاهما صمتا مضطربا ، ثم عنه بعض حركات
وتنهذات)

وحيدة هانم : (وهي لم تغير وضعها الذي كانت عليه ،
ولاهجتها السابقة ...) طبعا تذكر تأخذ لوليت وغير لوليت
بسهولة تامة ... مين ترفض ألف جنيه علشان ليلة واحدة ؟
دردیر أفندی : (وقد أحس كأن تيارا كهربيا قد
مسه ، يُقبل عليها ، ويتكلم بصوت مرتعش) صحيح
ما فيش حد يقرر يرفض ألف جنيه علشان ليلة واحدة ؟
(بصمت ويزداد اضطرابه ويحلق فيها بعيون تشع نارا ،
وهي مازالت مستلقية على المتكأ ، مسبلة الأجناف ...)
وحيدة هانم : ويهم إيه ؟ مش ليلة واحدة ؟ ...

(يرمي دردیر أفندی بنفسه على يديها ويغمرها بقبلات
جنونية ، ثم يذني رأسه شيئا فشيئا من رأسها ، ويهم بتقبيله .
تنار الحجرة بغتة . يدخل حسن القراش بالقهوة ، يقوم

دردیر أفندی نائرا ، ينظر إلى الخادم نظرة نارية ويصيح
في وجهه)

دردیر أفندی : عاوز إيه ...

حسن الفراش : الأهوہ يا بيه ...

دردیر أفندی : أهوہ في عينك ، يا بليد .. كنت فين ؟

(يزاد دردیر أفندی حدة وصياحا ويقول :)

عاوزين شبنانيا ، شبنانيا ، شبنانيا .. ! سامع ... شبنانيا !

(يخرج حسن الفراش مهرولا . دردیر أفندی يستند بجسمه

إلى الحائط ، ويمسح وجهه ، يظل صامتا ، تائه النظرات .

تمضي فترة وهو على هذه الحال ...)

وحيدة هانم . (كما هي على المتكأ) جرى لك إيه ؟ مالك

وائف مبلم كده ؟

دردیر أفندی : لا ... ما فيش حاجة ... دا بس ...

وحيدة هانم : بس إيه ! دا أنا كنت فاكروه ان القلوس

خلتك راجل تاني ... بأ انت اللي كنت عاوز تهيمص مع لوليت ؟

لوليت في عينك ..

(يعود حسن الفراش بالشبنانيا ... يضعها على المائدة

دى . دى لودهنوها بالذهب ، وبطنوها بوراً بتكنوت برضه
هى هى !!

وحيدة هانم : طول عمرك ماتعرفشى إيمه نفسك ؟! تعال
تعال !!

دردير أفندى : إيمه نفسي ؟ إيمه إيه يا ست هانم ؟! دنا
ماساويش بصله واحدة ... !!

وحيدة هانم : جيب لى كباية شميانيا ، وتعال هنا ...

(يعود إلى النظر فى المرآة ، ويخاطب خياله ...)

دردير أفندى : إخص عليك ! إخص على دى خلعة اتفوق
عليكى وعلى صاحبك ... !!

(يلتفت إلى وحيدة هانم ، ويقول لها فى لهجة

تهكمية مريرة ...) تعرفى يا وحيدة هانم ، الخنفس ؟ !

وحيدة هانم : الخنفس ؟ !

دردير أفندى : أيوه الخنفس الاسود الوحش دا ...
إلى شكله يترف ... !

وحيدة هانم : طيب ، وإيه المناسبة ؟

دردير أفندى : الخنفس دا لما تجيبه وتخليه يمشى على توب
حرير أبيض ، حرير أبيض ناعم زى ... زى خدك دا مثلاً ...
ماتفتكرش يعنى إنه يشوه جمال الحرير الأبيض الناعم دا ... ؟

وبياً الواحد نفسه يمسكه ويرميه في النار...؟!
وحيدة هانم : إيه الكلام الفارغ بتاعك دا يا سى دردير ؟
ما تتعدل وتتكلم كويس ... خنفس إيه ؟ وبتاع إيه ؟
دردير أفندى : ولو فرضنا انهم جابوا جوهرة ، جوهرة
عظيمة ، وحطوها في ظهر الخنفس دا ، حيتغير شكله ؟ مش
هو برضه الخنفس الاسود اللى يعرف الكلب ؟
وحيدة هانم : إحنا في إيه والا في إيه ؟!

(دردير أفندى يملأ كأساً ثم يدينها من فيه ليشربها .
ينظر إليها حيناً صامتاً ... ثم يرميها بقوة على الأرض ،
فتحطم الكأس ...)

دردير أفندى : روح والله ما انا شاربك !
(يخرج الأوراق المالية من جيبه ويحدها بنظرة
ملتهبة ، ثم ينهال عليها دعكاً وتمزيقاً في ثورة صاخبة ،
يشتبها فيها الضحك بالبكاء ...) فلوس ... فلوس إيه ...
في داهية ! على جزمى ! ... أهه ... أهه ...؟!
(تقفز وحيدة هانم من مكانها ، وتذهب إليه تحاول
منعه من تمزيق الأوراق المالية)

وحيدة هانم : بتعمل إيه ...؟ إيه الجنان دا ؟! يا حمار !
يا مجنون ??

دردير أفندى : (وهو منهمك فى ثورته الصاخبة ،
يمزق الأوراق المالية) لأ سيبنى ... لازم أأطعمهم كلهم !!
كلهم !! مستحيل أنا أكون غير دردير الصعلوك ، وانت غير
وحيدة هانم الجميلة الغالية !! احفضل أنا زى مانا ، وانت زى مانى !!
(يتابع تمزيق الأوراق ... تشور نائرة وحيدة هانم ،
وتهمج فتنها عليه ضربا ، فيقع دردير أفندى على الأرض ...)
وحيدة هانم : اخرج يا كلب !!! اخرج يا سافل !!!
اخرج يا حشاش ، ياسكرى !!! اخرج !!! اخرج !!!
(دردير أفندى يخرج زاحفا على يديه ورجليه ...
تعود وحيدة هانم إلى المتكأ . تستلقى على وجهها ، وتشهق
بالبكاء فى غيظ نائر قاتلة :)

وحيدة هانم : الكلب الدون !!! السافل !!! الدنىء !!
المجنون !!! ??

ستار الختام

انتهت

أَبُو شَوْشَةَ
كُوبِيَّةٌ مِنْ فَصْلِ وَاحِدٍ

أشخاص الزوايا

١ — مؤنس بك : زوج « يسرية » من أهل القاهرة ،
مقيم الآن في مزرعة « كفر البابل » ، عمره ثلاثون سنة .

٢ — يسرية : زوجته ، عمرها ٢٢ سنة . من أسرة
ريفية طيبة .

٣ — نازك بك : زوج « حسنية هانم » . كروى الشكل
له لُغد مهذل ، ومبادئ كرش . عمره ٤٥ سنة . نظره ضعيف .
يضع المنظار .

٤ — مصفية هانم : زوجته عمرها ٢٩ سنة .

٥ — عطوة باشا : من أغنياء الريف ، هجر ضيعته من
قديم ، واستوطن القاهرة . عمره ٦٠ سنة .

٦ — الشيخ غنرور : كان أزهرياً ، ولم يتم دراسته ،
يُناهِز الخامسة والخمسين . وهو من أذئاب « عطوة باشا »
ويعتبره الباشا مهرجاً له .

٧ — عوضين : خادم بمنزل « مؤنس بك » . فتى فلاح .
عمره ١٣ سنة .

٨ — برهمة : خطيبته . عمرها ١٧ سنة . ملحقة بمنزل
« مؤنس بك » .

٩ — أم سربيع : مربية « يسرية » . مقيمة معها بالمنزل .

١٠ — السبكي أفندى : كاتب الزراعة .



« يرفع الستار عن بهو بمنزل
 مؤنس بك في ضيعته (كفر البلابل)
 المنزل نظيف مرتب ، عليه الطابع
 الريفى . (يسرية) زوجة مؤنس
 بك ومعها مريبتها « أم سريع » ..

يسرية : النهارده البيه خلّوه طالع من صبا حية ربنا . مش
 عارفه ليه ؟

أم سريع : ربنا يكون فى عونه يا بنتى . دا جمال وجملة
 تليل . شايل كل شغل الزراعه على رأسه .
 يسرية : ما هو هو الى عاوز كده ... أمال المستخدم مين
 بيعملوا ليه ؟

أم سريع : المستخدم مين يا بنتى يا يسرية عايزين تملّى اللى يؤلهم .
 اعملوا و سوّوا . وجوزك مؤنس بيه ربنا يحرسه زى السبع

يَحْتَسِبُهُمْ عَلَى الْعَجِينَ مَا يَلْخَبَطُوهْش !

يسرية : دا يامّ سريع لاراحم نفسه ، ولاراحم الى وياه
أم سريع : لو ما كانشي كده يا بنتي ، كان إدر في السبع
سنين الى استلم فيهم العزبة يعمل حاجة ! ما هي كل الناس عارفه
عزبة كفر البلابل كانت إزاي أبل ما يجي يؤعد فيها .
دي كانت خراب . خراب يا بنتي ، والدّين مفرّأها لشوشتها
شوفي دلواتي بات إزاي ؟ جنة ! ولا فيش مليم واحد عليها .

يسرية : حد بينكر يا أم سريع ... ؟

أم سريع : ومن حبه في الفلاحين مارضيش يجوز الامنهم
عرف ينثي صحيح . عيله نضيفه ، وست أميرة زي السكره !
يسرية : ديهدي ياست أم سريع ، مين اللي يشكر في
العروسة ؟ !

أم سريع : يتأطع لسانني لو كنت يؤل غير الحأ... معلوم
دا اليه كله نظر . هو لو كان خد واحدة غيرك من مصر كانت
تقتعه بحاجه ... !

(يسمع صوت طبل بلدي ، ومزمار ، وغناء فلاحى)

يسرية : الله ! إيه ده ؟ هو فيه النهارده فرح ؟

أم سريع : ما فيش لافرح ولا حاجه .

(الطبل البلدي والمزمار والغناء مستمر)

يسرية : (منادية) يا برجسه ... يا برجسه ... !
(تقوم يسرية ومعها أم سريع إلى النافذة تطلان منها
تدخل (برجسة)

يسرية : إيه يابت الطبل ده ؟
برجسة : دا ياسقى جماعه من كفرنا راجعين من الزغبيّه
أم سريع : وكانوا بيعملوا إيه فى الزغبيّه ؟
برجسة : الجامع اللي كان يبينه عطوة باشا فتحوه النهارده ،
والتمت خلّاء الله من كل حتّه هنالك زى المؤلّد ، وراح
الباشا المدير بنفسه ومعاه المديرية كلها ...
يسرية : ماهو كانوا عازمين البيه . ومارضيش يروح ..
برجسة : ياسقى دا يثولوا انه كان احتفال شديد أوى .
دبحوا فيه الدبايح وفرّعوها على القُأرا ...

(يسمع صوت الطبل والمزمار بوضوح أكثر)
تعرفى ياسقى لو تروحي الأوده الابليّه ، تئدري تنفرجى
كويس

أم سريع : يا لله ياسقى تنفرج ، عؤّال عندنا ...
يسرية : يا لله !

(تخرجان وتبقى برجسة بعد قليل يدخل
عوضين)

برجسة : برضه جيت ورايه ؟ ديهدي ... ماتروح تتفرج
مع الناس بره ...

عوضين : أنا عاوز أشوف الصورة اللي مخياها في عبك ..
برجسة : (تضحك) صورة ؟ .. صورة إيه ؟

عوضين : بؤلك اللي مخياها في عبك ...

برجسة : « في خبث » طيب حزرلك صورة مين ؟

عوضين : والله لو كانت صورة سمسار الأطن اللي شفته يوم
السوء بيدحك لك وتدحكي له ، لبيأ نهارك أسود على دماغك
برجسة : نهارك انت اللي أسود على دماغك ... أهى الصورة
أهى ! ... شوف بأ مين فيها يا بو عال مجبّس !

(تخرج الصورة من جيبيها)

عوضين : (يأخذ الصورة وينظر فيها) صورة شليه
وجوزها !

برجسة : آه صورة شلية بنت خالة أبويا ... ألبك برد بأ ؟ !

عوضين : (يدقق في الصورة) وإيه ده اللي حطاه على
دماغها عامل زي العمّه ؟

برجسه : عمته ؟ دي برنيطه يا واد !
عوضين : برنيطه ! يا خير إسود وما ندل عليها ! بنت خالة
أبو كي شليه تلبس برنيطه ؟ !

برجسة : ماهي بات مضر اوّية من يوم ما اتجوزها عبد العال
أفندي وأخذها على مصر ... يا بختك يا شلية !

عوضين : (ينظر في الصورة) بختها على إيه يعني ؟ على
جوزها اللي قاعد جنبها منفوخ الدنيا كلها مش سانيةاه ؟

برجسه : منفوخ ؟

عوضين : عاجبك أوى ؟

برجسة : ماله ؟ مش آدر يلبس مرته فشر واحدة هانم ،
وما أعدها في مصر أم الدنيا ... آه يا مصر ! يعني مش حاروح
أشوفك ولو مرة في العمر ؟ ! (تنهد)

عوضين : (في عطف) ما تنهريش يا برجسه ... والله
لما نتجوز لوديكي مصر !

برجسة : (بهلل) والنبي ؟ !

عوضين : نروح نزور المشايخ ، واشتريلك بن وسكر ...

برجسة : (مفكرة) ويعني ما نثدرش بعد ما نتجوز نؤعد

على طول في مصر ؟

عوضين : نؤعد على طول في مصر ! ... وأسيب شغلي هنا
برجسة : تلائيك ميت شغلة هناك ...

عوضين : ميت شغلة إيه . يابت ما تخلى عألك في راسك
شوية . أنا ما ألتلك ما تسمعيش الحكايات اللي يحكوها عن
شلبية . دا كله هجص . ماتمليش دماغك بالكلام الفارغ ...

مؤنس بك : (وهو في الخارج يصيح بأحدهم)
أنا ألتلك المسائي تسدوهم ، ازاي ألا ئيهم مفتوحين؟ والمحارث
ففين؟ ما اشتغلتنوش ليه في حوض أبو زكريا؟ يعني لازم أعيد
لكم الكلمة ميت مره على شان تفهموا يا بهائم؟

عوضين : (في خوف) البيه النهارده خلؤهُ طالع أوى

مؤنس بك : (من الخارج صأحا بفضب) يا عوضين !
يا عوضين الكلب ... !

عوضين : (يخرج مهرولا من الباب الايمن وهو يصيح)
حاضر ... حاضر ...

(برجسة تنظر من النافذة ، ثم تتركها وتجري خارجة
من الباب الايسر ... بعد قليل يدخل مؤنس بك وخلفه
عوضين)

مؤنس بك : أنا سايب العجل أبو شوشه امبارح واكل
عليه في أمان الله ، أهوم أروح له النهارده الأئني عليه مدمعه
ومش عاوز يارب للمدود ... ليه ؟ عملتو لو إيه ؟ لازم يكون
أكل حاجة بطاله ...

عوضين : حاجه بطالة ؟ لاوراس سعادتك ، بأ نبأ جنبه
وياكل حاجه بطاله ؟

مؤنس بك : تعرف لو يجراله حاجه ، والله تبأ سنتكم زى
بعضها .. ؟

عوضين : مش حايجرا الا كل خير ... إن شالله ما تنسو
فيه أبدا . والله دى عين وصابته !

مؤنس بك : اسمع . أنا أديت له الدوا دلواتى . فروح
جيب أبو هجرس العجوز من بيته ، وأله يؤعد جنب العجل .
وبعد ساعه يديله الدوا تاني مره . أهو مافيش غير أبو هجرس
اللى ينفعنى فى الأحوال دى . أله ماينتثلشى من جنبه . قاهم ؟
ماينتثلشى !

عوضين : حاضر ...

مؤنس بك : أفهم كويس .

عوضين : حاضر ...

(يخرج عوضين ... مؤنس بك يمش على المقعد ،

ينفخ ويخفف عرقه ... تدخل يسرية في شيء من الحذر)
يسرية : (وهى مقتربة منه) أعمل لك كباية شربات لون
مؤنس بك : كباية لون (تجلس بجواره وتلاطفه في
حذر)

يسرية : تروأ دمك شويه ...
مؤنس بك : إن شالله ماراء .
يسرية : ليه بعيد الشر ! (بعد صمت قصير) متحأ
ماسأ لتتبش على التآوى اللي طلبت منى أوضبها لك .
مؤنس بك : (فى إهمال) التآوى ؟ !
يسرية : اللى حنأدما بعد بكره فى معرض كفر الريان .
مؤنس بك : (فى إهمال) هيه ؟
يسرية : وضبتها زى ماألتلى تمام . و كان جهزت مواعين .
اللبن وعدة الزبدة ، والترايزات كلها نضيفه بتلمع زى البنور
مؤنس بك : ولكن أنا مش مودى حاجه فى معرض .
كفر الريان !
يسرية : ياد هوتي ! ... ليه ؟ دا انت بآلك كام يوم ما بتشمسى .
علشان خاطر المعرض ده ...

مؤنس بك : (مندفعاً) طهؤت . طهؤت من كله ا..
من المعرض وأصحاب المعرض ... من المستخدمين وشغل
المستخدمين ... من الارياف وعيشة الارياف ... مانيش شايف
راحة من حاجة أبداً !!

(صمت قصير ... مؤنس بك يتناول جريدة الاهرام
ويتصفحها)

يسرية : (محاولة إدخال السرور عليه) تعرف الشوية
بالبن اللي فضلم في الحلة امبارح ، عملتهم جبنه زى ما علمتى ..
مؤنس بك : (في إهمال) إهيه ...

يسرية : أما أروح أجيب لك حته ، أدواك منها ...
(تخرج مسرعه وتعود بطبق فيه قطعة جبن تدينه من
مؤنس بك)

يسرية : خد دوء كبده ...

(يتناول من الجبن قطعة ويتذوقها)

مؤنس بك : ناءصه ملح !

يسرية : ناءصة ملح ؟ ماهو انت اللي ألت لى حطى ملح
شوية ...

مؤنس بك : (مجفوة) بؤلك ناءصة ملح و خلاص !
(يسرية تأخذ الطبق ، وتضعه على إحدى الموائد)
يسرية : (واقفة في حزن) معما عملت ما فيش حاجة تطلع
كويسة من إيدى !

مؤنس بك : أوه ... أنا مش راينى لكلامك ده !!
يسرية : راينى والا مش راينى ... أنا فايتالك النهاردة البيت
(تنهياً للخروج من الباب الايسر)

مؤنس بك : فايتالى البيت ؟ ا رايحه فين ؟ ... !
يسرية : (على عتبة الباب) نيتنى عيانه شوية ، آمت
بعنت لى أروح لها ...

مؤنس بك : وما ألتيلش ليه ؟
يسرية : هو حد عارف يكلمك ؟

مؤنس بك : (مبتسما) طيب ومستعجله ليه أوى كده ؟
(يقصد اليها ويلطفها) إنت زعلت مني ؟ ما اتى يا يسريه عارقه
انى عصبي ، والنهارده طهؤنى في عيشتى ... بأكل حاجة صغيرة
تاخدى على خاطرلك منها ا طيب معلش ا هاتى راسك (يقبلها)

فى راسها) حثك على (وهما خارجان من الباب الايسر)
ابنى سامى على نيتك كثير ، وأولى لها سلامتك !

(بعد قليل يدخل السبكي أفندى كاتب الزراعة حاملا
ملفات ... يعود مؤنس بك فيراه ..)

مؤنس بك : أعوذ بالله من الشيطان الرجيم ...! يعنى مش
حرتاج منكم شويه ؟

السبكي أفندى : ونا يافندم زنى إيه ! سعادتك ألت لى
جهاز لى كشف العوادم ، وسركى الشغالة ، وآيمة النأديه ...
مؤنس بك : طيب ياسيدى ورنى !

(يجلس على منضدة شبه مكتب ، وأمامه السبكي
أفندى يقرأ له ...)

السبكي أفندى : كشف العوادم عن المدة من أول يونيه
لغاية آخر أغسطس : بلطة حديد ، أصل تمنها ١١٠ ملیم ، المرتجع
حديد خردة إيمتها ١١ ملیم . حصر بردى العدد ٢٠ استهلكت
وليس لها مرتجع ... حبال للبواشى ١٠ أقه ، أصل تمنها واقع
الدقتر ٨٠٠ ملیم ، استهلكت بأكملها وليس لها مرتجع ...

(يرفع مؤنس بك نظره عن الملف)

مؤنس بك : (السبكي أفندي) أظن ما تعرفني حضرتك
ان العجل أبو شوشه عيان ؟

السبكي أفندي : عيان ؟ إزاي دا ؟

مؤنس بك : ونت داري بحاجة من اللي بتحصل في العزبه
السبكي أفندي : سعادتك ما انت عارف اني كنت في كفر
الريان علشان مسألة المعرض الاقليمي ، كل الناس هناك بتقول
ان ابو شوشه حاياخد الجايزه الذهبيه اللي أبل الاولانيه .

مؤنس بك : دا يستحق الجايزه الزهبيه في معرض لندن
مش في معرض كفر الريان !

السبكي أفندي . عجل صحيح زى العروسه ، باسم الله ماشاء
الله عليه . دي لازم عين وصا بته

(يدخل عوضين ...)

مؤنس بك : هيه ، شفت أبو شوشه ؟

عوضين : لا والله ياسعادة اليه !

مؤنس بك : أ مال جاى علشان إيه ؟

عوضين : عطوة باشا جه ومعا ضيوف برّه

مؤنس بك : حاء أنا قاضى أوي لعطوة باشا ... ومين

الضيوف اللي معاها ؟

عوضين : الشيخ غندور

مؤنس بك : عارفينه ...

السبكي أفندى : هو الباشا يندر يستغنى عنه ؟ !

مؤنس بك : مين غيره ؟

عوضين : واحد بيه والست حرمة

مؤنس بك : واحد بيه والست حرمة ؟ ... ماجوش أبل
المرّة دى هنا ؟

عوضين : ماشفتهومش وراس سعادتك ؟

مؤنس بك : طيب خليم يتفضلوا ... (للسبكي أفندى)

أوم انت دلواتى ياسبكي أفندى بعدين نخلص الشغل دافى فرصة
تانيه

(يدخل عطوه باشا ومعه حسنيه هانم وخلفهما ظاظا
بك والشيخ غندور ... يفاجأ مؤنس بك بمراى حسنية
هانم فيظهر عليه الارتباك والدهشة ... يتغلب مؤنس بك
على ارتباك ودهشته ويتقدم للترحيب بالزائرين :

أهلا وسهلا شرفتم وأنستم !

(يسلم على عطوة باشا فيشد على يده)

عطوة باشا : أهلا بك ، أنا جاي بك ضيوف من أحبابنا

مؤنس بك : يشفوا/ويا نسوا !

عطوة باشا : (يقدم الضيوف لمؤنس بك) حسنية هانم
حرم ظاظا بك . ظاظا بك يقدم مؤنس بك للضيوف :
مؤنس بيه ...

(يسلم مؤنس بك عليهم ويرحب بهم)

مؤنس بك : تشرفنا يا هانم .. تشرفنا يا بيه

عطوة باشا : (بمداعبة) وأدم لك مكان صاحب الفضيله

الشيخ غندور !

الشيخ غندور . ينحني أمام مؤنس بك ويقول :

En chanté أن شاتيه !

(اجمع يضحك)

ظاظا بك : (لمؤنس بك) إحنا تهجمنا على البيه من غير
سائب معرفه . ولكن عززنا في كده إن عزبة سعادتك أصبحت
مضرب المثل في الأوطار المصري كله... فألنا دى فرصة ما نضيعهاش
عطوة باشا : (لمؤنس بك) ظاظا بيه والهانم كانوا معزومين
عندى النهارده في حفلة افتتاح جامع الزغبه اللي سعادتك هربت
منها .. هو دا يصح ؟ .. انت تمللى قاعد لوحدك كده مش باين ؟

(مؤنس بك يشير الى الزوار بالجلوس)

مؤنس بك : (لعطوة باشا) ما كنت زى حالنا ياباشا .

كان الواحد يطلعك من البيت بالتَّيْلِه ، ويَوَدِّك البندر !
عطوة باشا : هو الانسان يابنى فى الدنيا يفضل على حال
واحد ؟ أهو زى الهدوم ، كل يوم يفوت عليها يتغير لونها
وشكلها !

الشيخ غندور : صدأت والله ياسعادة الباشا أهو جيتى دى
بآلها عندى ثلاث سنين ... كل سنه ألايها على لون
(الجميع يضحكون)

مؤنس بك : (لحسنية هانم) إن شالله تكون الحفلة
عجبت الهانم ؟

حسنية هانم : جدا . حفله كانت لطيفه أوى !
ظاظا بك : وكانت الوليمة اللى عملها عطوة باشا مدهشة .
مدهشة للغاية ، حوَّت مالد وطاب من الأطعمة ...
الشيخ غندور : (لظاظا بك) بس سعادتك مع الأسف ،
يعنى أصدى ! ...

حسنية هانم : اليه يعمل رجيم ...
ظاظا بك : أيوه ، رجيم جامد !

الشيخ غندور : (الحسنية هانم) بس كان سعادتك في مناسبة زي دى ، كنت سمحت للبيه ولولبؤمه صغيرة من الفطير المثلت ولحسه من مَترِد اللبن ، كان يدعيلك !!

عطوة باشا : (ضاحكا) ولا حتى معلا من طاجن الرز المعمّر .

ظاظا بك : (على الرغم منه) والله أنا طول عمرى أحب النواشف !

مؤنس بك : (لظاظا بك) اليه يظهر بيشتكى من حاجه .. حسنية هانم : عنده ميل للسمنة . ومبادئ ضغط دم ، غلشان كده لازم يحاسب على نفسه شويه (تضع عصابتها الجيرية على أحد المقاعد)

الشيخ غندور : (الحسنية هانم) دا محاسب على نفسه أوى بفضل سعادتك . حياه صحيه تمام . من الساعة تسعه مساء في السرير ، وان كان نفسه كهفته على حاجه من المشروبات ، فكفايه فنجان من الينسون أو الكراويه ، بعد الأكل ...

(ظاظا بك ناظر بغيظ دفين إلى الشيخ غندور ...

حسنية هانم لاتفارق عيناها وجه مؤنس بك ...)

ظاظا بك : (يريد تغيير مجرى الحديث . يقول

لمؤنس بك) : الزراعة بتاعت سعادتك حاجه حلوه أوى . أنا
ما شفتش فى وجه بحرى زراعه تانيه تضارعها . الأحم يحيب
عندكم كام تأرييا ؟

مؤنس بك : يحيب تمانيه ، تسعه ...
ظاظا بك : برضه أنا بؤول كده ... والأطن ؟
مؤنس بك : متوسطه سبعة .
ظاظا بك : دا تأديرى أنا تمام ! ؟
مؤنس بك : يظهر سعادتك مهمم بالزراعة ؟
ظاظا بك : والله ليه غيّه فيها ...

عطوة باشا : (لمؤنس بك) ظاظا يه يحب يتفرج على الأطنيان
بتاعتك كويس ...

مؤنس بك : بكل سرور ، أنا احب أوريكم الأطن الجديد
اللى استنبت بزرتة بنفسى ... أفتكّر حايضاهى السكلاريدس !
عطوة باشا : كنت بتدور له على اسم .
حسنية هانم : (محدقة فيه) يا ترى سميته إيه ؟

مؤنس بك : (خافضاً بصره) والله لغاية دلوقتى يا هانم
ما عترتش على اسم يعجبني !
حسنية هانم : بس إذا اخترت له اسم ، ماتباش تغيره .
مؤنس بك : ليه ؟

حسنية هاتم : مش كويس ... عندى فكره مش لطيفه
عن الشيء اللى يتغير ويتبدل ...

(مؤنس بك يطرق برأسه)

عطوة باشا : يتغير إيه ويتبدل إيه ؟ سيونا من الكلام دا
(مؤنس بك) أظن حاتلدم حاجه من الأطن دا فى المعرض
الأقلىمى بتاع كفر الريان ؟

مؤنس بك : كنت حادم ، ولكن سحبت نفسى من المعرض
عطوة باشا : إزاي ده ؟ دا سعادة المدير كلفني بنفسه أولك
انه عايزك بكره تآبسه بالخصوص دا . انت ناسى ان المعرض
معاذُه بعد بكره ؟

مؤنس بك : والله يا باشا نفسى انسدت من المعرض ومن كله

(يدخل عوضين ...)

عوضين : الركائب جُهزم

الشيخ غندور : (مؤنس بك) ماتأخرناش سعادتك ..
إحنا بأمرك طلبنا من الناظر يجهز ركائب علشان ظاظا ييه
يجب يمر شويه فى الأطنان !
ظاظا بك : أيوه ، أيوه ... ولكن بس مش دلواتي !
(لعوضين) خلى الركائب تستنى شويه ...

حسنية هانم : (لظاظا بك) مش دلواتى ليه ؟ انت
الحكيم واصف لك الرياضه ... ومع ذلك مابشوفكشي
تتحرك أبدا ... فرصه علشان تجربى دمك !

ظاظا بك : ماهو أيوه .. بس .. (ينظر إلى عطوة
باشا مستغيثا)

عطوة باشا : كنا نحب نؤعد شويه فى الجنينه ، نبل ريتنا
بشوية مرطبات .

الشيخ غندور : أيوه حاجة من المنعشات ... !
عطوة باشا : (منحنيا على أذن مؤنس بك) أظن بيت
السبع ما يخلأشى !

مؤنس بك : والله على بختكم جاتنى هدية ، إزازه عرّاني من
أفخر مايكون ، لسه مختومه بيختم بلدها !
عطوة باشا : عظيم أوى ... وماتنساش شوية مزه فلاحى
من اللى عندكم !

(ظاظا بك يتطلع باهتمام ، ويتلمظ ... مؤنس بك يسر
لموضين بما يريد وإذيههم عوضين بالانصراف ، يستوقفه
مؤنس بك ويقول :)

مؤنس بك : ولا خللى حد يجيب الحاجات اللى ألت لك

عليها ، في الجنينة ، وروح انت شوف أبو شوشه

عوضين : حاضر !

(عوضين يتهيأ للخروج)

حسنية هانم : اسمع يا عوضين ... عاوزين كباية شربات

لمون للبيه (مشيرة إلى زوجها ظاظا بك)

عوضين : حاضر !

الشيخ غندور : (لظاظا بك) دا لمون بزهر من

الجنينه دى ... حاجة أهبة تمام (لمؤنس بك) طيب وانا

ما ليش نصيب في البزهر ده ؟ يا عالم ريشى ناشف !

(ظاظا بك ، في أشد المضايقة ، يروح على رأسه بالمنديل)

مؤنس بك : حاضر ! ... (ويشير إلى الخادم)

عطوة باشا : يا لله يا جماعة على الجنينة بأه

مؤنس بك : اتفضلوا ...

(لا يسكاد الجمع يخرج ، حتى نرى ظاظا بك عائدا

يبحث عن شيء على المقاعد)

ظاظا بك : (لنفسه) أنا مانيش عارف حطت التوربان

دا فين ؟ يمكن ساجته في الأتميل ...

(في أثناء بحثه تدخل برجسته وتنظر الى صورة فتوغرافية في يدها. ظاظا بك ينظر الى برجسته... ثم يتابع بحثه في ملل وضجر ... يختلس اليها النظر ... تتقدم برجسته منه)

برجسته : ضايح منك حاجه !
ظاظا بك : التوربان بتاع الست مانيش عارف سابعه فين ؟
برجسته : جنسه إيه ؟
ظاظا بك : حرير ..
برجسته : ولونه ؟

ظاظا بك : لونه ؟ (يفكر) دا فيه ميت لون !

(تضحك برجسته ويضحك هو أيضا)

ظاظا بك : ماتجيش تدورى معاى عليه ؟
برجسته : مادوررش ليه ؟ حاضر ...

(يبحثان معا عن العصا ، ظاظا بك معجب ببرجسته ،

ينظر اليها كثيرا . هي تلاحظ ذلك فتسر . يضحك كل منهما للآخر مرات ، يفرقان في الضحك بلا مناسبة . يفتشان

في أعطاف المتسكأ . ظاظا بك تعثر يده على يد برجسة
مصادقة فيمسكها ويقول)

ظاظا بك : مش هو دا التوربان ؟

برجسة : دى إيدى !

ظاظا بك : (وهو يلاطف يدها) دَنَا باحسبها التوربان
ياشيخنة ... ماهي ناعمه زى الحرير !

برجسة : (تضحك وتحجب نصف وجهها بالخمير)

سيب إيدى !

ظاظا بك : أولى أبله اسمك إيه ؟

برجسة : برجسة ...

ظاظا بك : برجسة ؟ ياشيخه ماتؤليش كده... بأ ما تش
عارفه اسمك ؟

برجسة : والنبي اسمي برجسة !

ظاظا بك : برجسة إيه ؟ ... اسمك نرجسة !

برجسة : نرجسة ! (تضحك مسرورة) تعرف بنت

خالة أبويالما اجوزت وراحت مصر سموها إيه ؟

ظاظا بك : سموها إيه ؟

برجسة : شوشو !

ظاظا بك : شوشو ... ؟ !

برجسة : (تريه الصورة) شوف صورتها ...

ظاظا بك : (ينظر فى الصورة) ديهدى ، دى ألفرنكه
خالص !

برجسة : هناك ! ... بتلبس دلواتي البرنيطة والجزمه اللي
كعبها على زى الأبأب !

ظاظا بك : والله لها بخت !

برجسة : (بحسرة) فيه ناس بتاكل البلح ، وناس تنزأل
بالنوا ! ... (تقع عينها على العصاية الخيرية) ماتكونش
هي دى اللي بتدور عليها ؟ (تشير لـإليها)

ظاظا بك : (ينظر إلى الناحية التي أشارت إليها)
أى والله هي . عفارم عليكى ! (يأخذ العصاية)

برجسة : (تنظر فيها وهي فى يده) حلوه خالص ! ...
ودا بيتأ يلبسوه ازاي ؟

ظاظا بك : عاوزه تعرفي يلبسوه ازاي ؟

(يأخذ فى وضع العصاية على رأسها ، يدخل فى أثناء

ذلك عوضين فلا يراه أحد . ظاظا بك يداعب خذ برجسة
وهي تضحك . ظاظا بك يتم وضع العصا على رأسها ..
ظاظا بك : ازيك بأ ؟ داني بئني حلوة خالص ... !
(برجسة تهرع إلى المرأة ، وهي تضحك مسرورة)
عوضين : (في غيظ بصوت عال) بلاش إلت حيا
يا بت يا برجسة !

برجسة : (وقد انقطع ضحكها ، تلتفت نحو عوضين
مغيظة) إلت حيا ؟ إيه كلامك ده ؟ !
عوضين : (وقد ذهب إليها ونزع العصا عن رأسها
وطرحها على الأرض) وكان يتردى عليه جك أطع لسانك !
ظاظا بك : (يلتقط العصا من الأرض) جرا إيه
يا راجل ؟ إلت مالك وماها ؟ (ينظف العصا ويضعها على
المقعد باحتراس .)

عوضين : مالي وماها ازاي ؟ دي أريبي وكان مخطوبالي !!
ظاظا بك : (متسائلا) مخطوباله ؟

برجسة : (لعوضين) مخطوبالك ؟ فشر ! هو أنا مالتيش
إلا انتة يارع يا بوزنه أّجوزّه ؟ !
عوضين : أنا أّرع أبو زنه برضه ؟ طيب والله ما انت
خالصة من إيدي يا بنت المراكوب (يمسك بتلايديها)
ظاظا بك : (يدخل بينهما) حاسب يا ولد سيب البنت ،
بثّول لك سيّتها !

عوضين : (ينهمك في الضرب فتقع اللكبات على ظاظا
بك) مالكش تتجشّر بينا . (لبرجسة) أنا أّعرّف
برضه أريكي !! (ظاظا بك يستطيع في النهاية تخليص
برجسة . يسرّ إليها أن تترك الغرفة فتخرج مسرعة من
الباب الأيسر . ظاظا بك في حالة بشعة مهكوك رباط
الرقبة . مصاب في وجهه بكدمات)

ظاظا بك : (لعوضين) إنت اتجنيت يا راجل تّعمل
العملة دي ؟

عوضين : (بصوت عال) اتجنيت ازاي ؟ لازم أّربها
ظاظا بك : (وهو منهمك في إصلاح نفسه أمام المرأة)

بس مازعأش كده ، دانت حمى أوى ولكن باین عليك انك
راجل طيب !... (یمد یدہ إلى عوضین بقطعة نقود) خد
أُم عشرة دى علشان تشتري بهما دخان ...

عوضین : (بغضب) ما بـشربش دخان ! !

ظاظا بك : (متضاككا یخفى خجله) الله یجازيك أمال
بـشرب إيه ؟

عوضین : (وهو خارج من اليمين) ما بـشربش حاجة .

ظاظا بك : (وهو یمسح وجهه) إف ! ... أعوذ بالله !
(یجلس على أحد المقاعد وهو یروح على وجهه ، بعد قليل
تدخل حسنية هانم ومؤنس بك)

حسنية هانم : (لظاظا بك) بأ بعـتك تجیب لی التوربان .
أوم ألا نيك أعد على الكرسي تهوى على وشك ! (تلاحظ
الكدمات التى أصابت وجهه) الله ! مال وشك مـزرىء
كده ؟

ظاظا بك : وشي مـزرىء ؟

مؤنس بك : هو جرى حاجة یا ظاظا یه ؟

ظاظا بك : لا مافيش . دانا بس وانا بدور على التوربان
أمت اتكعبلت مش عارف فى إيه ؟ وئعت علي وشى !
حسنية هانم : طول عمرك شاطر ... ! ولئيت التوربان ؟
ظاظا بك : (يناولها إياه) أهه !

حسنية هانم : (وقد اخذت العصا) اللهناته بتاعتك
مستنيالك من زمان فى الجنينه ..
ظاظا بك : إى والله أنا عتشان أوى .. اسمحوالى اسبأكم
لامؤاخذه !

حسنية هانم : ماتنساش ان الناظر مستنيك بالركايب ...

ظاظا بك : (متسائل) مستنيني بالركايب ؟ !

مؤنس بك : عتشان مايفرجك على الأطيان .

ظاظا بك : آه . آه . مفهوم ! مفهوم ! (يخرج)

(مؤنس بك وحسنية هانم ، وقد استوثقا من خلو
المكان ، يأخذ كل منهما بيد الآخر متقابلين وجها لوجه .
ينظر كل منهما للآخر محققاً فى سرور)

مؤنس بك : (فى لهجة اشتياق) حسنية ! حسنية هانم

حسنية هانم : (بمثل هذه اللمجة) مؤنس !

مؤنس بك : أنا مش مسدد أعينى أبداً ، ألايكي هنا في
العزبة بعد فراء سبع سنين ؟!

حسنية هانم : صدفه مدهشه !!

مؤنس بك : وحشتيني أوى ...

حسنية هانم : ما نا وحشتك ؟ ما أظنش ..!

مؤنس بك : ما تظننش ؟ يا سلام ! ... بأسيقتي جي وإخلاصى

حسنية هانم : حبك وإخلاصك ؟ ما كنتش بفكر أبداً إن

الحب والاخلاص ينتهي بالشكل اللي انتهي عليه ! ..

مؤنس بك : آه يا حسنية ... الظروف كانت آسية .

لما كان أبويا عايش ما كنتش مهتم بحاجة أبدا في الدنيا . كانت

الفلوس بتيجيني من غير ما كنت عارف بتيجي منين ... كل شيء

كان منور أدامي وحبنا كان يزيد يوم بعد يوم في السعادة دى

حسنية هانم : سعادة خداعة ...

مؤنس بك : فلما مات أبويا انكشف لي مرة واحدة كل

شيء : ارتباك ، ديون ، أملاك مرهونه ، لثيت نفسى على

شفا الافلاس !

حسنية هانم : لو كنت بتيجيني صحيح كنت اتجوزتني

بالرغم من كل ده ...

مؤنس بك : ما كنتش أأدر يا حسنية أبدا ... كنت في

حالة عسر شديدة !

حسنية هانم : أنا كان عندى كفايه ...
مؤنس بك : كان عندك فوء الكفايه ... سروتك كبيره ،
وعلشان كده ماتجوزتكيش !
حسنية هانم : طول عمرك تفسك كبيرة ...

(صمت قصير)

حسنية هانم : (وهى تطأطأى رأسها) الله يلعن الفلوس
الى بعدتنا عن بعض .
مؤنس بك : كل شىء إسمته يا حسنيه فى الدنيا دى ...
لو كنا عرفنا بعض بعد ما أدركت أنظم أحوالى المالىه كان اتغير
كل شىء . . .

(حسنية هانم مطرقة تداعب أصابعها مداعبه عصبية .
صمت قصير . مؤنس بك يتابع حديثه)

مؤنس بك : فى اليوم التانى لآخر مؤابله لنا سافرت على
هنا وسكنت فى البلد دى وأطعت صلاتى بكل شىء بربطنى بمصر
حسنية هانم : حتى بي أنا !

مؤنس بك : بالرغم منى عملت كدا ، لأن دا الحل الوحيد
الى كان أدامى . كنت سائر على نفسى وعلى الناس ، وعلى
العالم كله . هربت من الدنيا بتاعتي الى كنت بحبها . واللى

دؤت فيها النعيم ... ودفنت نفسي هنا ، واستأثلت في الشغل . .
كل دا علشان أنساكي !

حسنية هانم : وإدريت تنساني ؟
مؤنس بك : الحيز بيفضل كثير والع تحت الرماديا حسنيه
حسنية هانم : (في ألم وهي مطرقة) أظن الحجر دا
انطفا ، وما بأش له أسر في النار !

مؤنس بك : (في حماس ، وقد أمسك يديها ، وشد
عليهما) حسنيه ، بصي لي كويس ، أنا مؤنس بتاع زمان ،
مؤنس بألبه ودمه وشعوره ! ... اعحى من فكرك كفر البلايل
والزغيبه والفلاحين . واتخيلي تفسك في جنبنة الأرمان تحت
الشجرة اللي حفرنا عليها أول حرف من إسمننا ... كنت ماسك
إيدك زى ماني ماسكها دلواني ولا ففدراعى حوالين وسطك ،
ومأرب وشي لوشك ... وبؤلك أحبك يا حسنية ، أحبك
يا روحى !

حسنية هانم : (في غيوبة ، وقد التصقت به ، وأدنت
شفتيها من شفتيه) حبيبي مؤنس !!

(في هذه اللحظة ، وقد أوشكت شفاهما أن تلتصق
في قبة نارية ، يسمع بوضوح خوار عجل متواصل .

مؤنس بك يرهف أذنيه ، ثم يترك حسنية هانم ويهرع
إلى النافذة وهو ينصت)

مؤنس بك : (صارخا) جري إيه ؟ مال ابو شوشه ؟

عوضين : (من الخارج) مافيش حاجة ، دا ابو هجرس

بيدّيله الدّوّآ ...

مؤنس بك : آ . طيب ، يحاسب عليه كويس ، خدّو

بالكم منه ...

(يعود إلى حسنية هانم فيجدها مدهوشة مغيظة ،

يريد أن يستدرك خطأه ، يقترب منها ويقول :)

مؤنس بك : تعرفى انا محتفظ بمجموعة الصور اياها ،

المجموعة بتاعتنا ... أفرّجك عليها ؟ (يأخذ يدها في لطف

ومداعبة) تعالى ... تعالى ...

(يجلس معها أمام المكتب ، ويفتح أحد الأدرج

بالفتاح ، ويخرج مجموعة مختلفة من الصور الشمسية ، ثم

يبدأ يفرجها)

مؤنس بك : شوفي الصورة دي ؟ فاكرها ا كتنا جنب

الهرم يومئذ . ياسلام ، منظر لطيف أوي ، شوفي كنت
بتضحكي فيها ازاي ؟ !

حسنية هانم : انت منحا كنت لابس وأتها ليه برنيطة ؟
كنت استلقيتها من واحد من السّواحين ، لما استلف هو
طربوشك علشان يتصوّر بيه ... آه ، صحيح ... كان
شكك غريب أوي في البرنيطة . عامل فيها زى البآل الرومي ...
(يتضاحك . مؤنس بك يقلب في الصور ثم يريها واحدة
وهو يقول)

مؤنس بك : وشوفي دي !

حسنية هانم : (تأخذ منه الصورة) صورة مين دي ؟

مؤنس بك : مانيتش عارقاها ؟

حسنية هانم : أعوذ بالله ، مالى طالعة وحشه كده ؟ !

مؤنس بك : كنت مكشّرة شويه من الشمس ...

حسنية هانم : يصح تخلى عندك صورة زى دي ؟ كان
حآك أظعتها ...

مؤنس بك : ياسلام ! أنا أأطع صورتك ؟

حسنية هانم : مادام وحشه ...

مؤنس بك : ولو ! ... ومع ذلك التكشيره دي بديعه أوي !

حسنية هانم : (وهي تضحك) بديعة ؟ هو فيه تكشيره

بدیعة؟! (حسنية هانم تقلب فی الصور التي فی الدرج ، ثم

تعثر علی واحدة تخرجها وتحقق فیها بدهشة)

حسنية هانم : الله ! ودا إيه اللى خطه معنا كان ؟

مؤنس بك : (يتطلع فی الصورة ، ثم يضحك) ماهو

لامؤاخذه أبو شوشه دا من غير تكليف معنا !!

حسنية هانم : (وهی تطرح الصورة جانباً) يوه ، هو دا

المحسب علیه ابو شوشه ؟ (تدير وجهها بعيداً)

مؤنس بك : (يأخذ الصورة ويتأملها فی شغف وهو

يبتسم) تعرفي يا حسنية ، دى صورته وهو لسّه عمره أسبوع

واحد . شوفي والنبي شوفي حلوا زاي ؟ زي اللعبة تمام ، الواحد

لما كان يملس علی شعره ماتشوليش حرير ! ... وعنيه ؟ ياسلام

علی عينيه يا حسنيه ! ماتشوليش الماظتين برلنته ... وشوشته

اللطيفة اللى فی أورطه ، بيضه بيضه زى الأطن النضيف ! ...

(حسنية هانم تتركه وتخطو خطوتين الى الأمام غير

مبهتمة بحديثه ، وتاركه إياه يتكلم) تعرفي دا انا استلمته لخمه

حمره يوم ولادته ، كان زى العيّيل تمام ، وفضيلت أربى فيه

وأعتني بيه لما بآ دلواتى ماشاء الله زى الفحل ، يملأ العين تمام!
(مؤنس بك يترك موقفه ويذهب حيث حسنيه
هانم ... صمت قليل ... حسنية هانم تروح على وجهها
بجريدة وجدتها على مقربة منها)

حسنية هانم : الدنيا حر النهارده !
مؤنس بك : صحيح ! حر شويه ...
حسنية هانم : أمال فين هوا الريف بتاعكم ؟ !
مؤنس بك : كان شويه لما تأرب الشمس تغرب ، وتنكسر
حدثها ، يبتدى الجو يلطف ، ويهب النسيم اللطيف ...
حسنية هانم : يظهر انك مبسوط من حياتك هتا ...
مؤنس بك : حد ينهسط من المنفى دا ؟ دى عيشة تطها
حسنية هانم : ولكن ماتنكرش ان صحتك جت على الريف
أوي !

مؤنس بك : عاوزه تؤولى انى سمعت ؟
حسنية هانم : لأ مش سمعت ، صحتك اتحسنت عن
أبله كثير ... ولكن اسمرّيت !
مؤنس بك : (يضحك) صحيح اسمرّيت ! بلّيت كسبه !
حسنية هانم : السّمار دا خايل فيك أوي ...

مؤنس بك : (يمسك يدها ملاطفا مبتسما . ثم يقول)
تعرفى أنا أول ما شفتك والله كدت ماعرفكيش !
حسنية هانم : ليه ؟ اتغيرت أوى
مؤنس بك : فرء بين حسنيه البنت الخمام اللي كانت .
ما تعرفش حاجه ، وحسنية الهانم اللي كلها أنوثة وسحر .
فرء بين الثمرة الخضره والثمره الناضجه ، بين الورده المأفولة
اللي لسه من غير ريحه ، والورده المفتحة اللي عطرها ينفوح
منها !!

(حسنية هانم تضحك فى دلال)

مؤنس بك : ياترى حانشوف بعض بعد المره دي ؟ .. ليه
ما تكرريش زيارتك للريف ؟
حسنية هانم : وانت ليه ماتجيش مصر ؟
مؤنس بك : مصر ... مصر ... مين حيودبنى فيها ؟
حسنيه هانم : (فى إهتمام) أنا ححتفل بعيد ميلادي بعد
بكره ... جعل خفله صغيره ، حعزم فيها بعض الأراب ،
والاصحاب . حيحضروها . عطوة باشا والشيخ غندور ...
ماتجيش تيجى ؟ ...
مؤنس بك : (فى دهشة) أنا ؟ !

حسنية هانم : فرصة علشان نفرّج عن نفسك شويه ...
تؤعد كام ليلة معنا ، تعيش تاني حياتك الأولانية ... نروح
مرة السينما ، مرة التياترو ، مرة السبّا ، نشرب الشاي مرة في
هليوبوليس ، نتعشى مرة في مينا هاوس ، نخرج بالأتومبيل بالليل
نتفصح في سكة السويس والفيوم ...

مؤنس بك : (وهو آخذ بيدها ، وناظر أمامه في شبه
غفوة) : سينما ، تياترو ، هليوبوليس ، الفيوم ... أحلام .
ياترى تتجأ ؟ !

حسنية هانم : تتجأ إذا كنت عايز تتجأ ها !
مؤنس بك : ونروح الأهرام وننفسح جنب ابو الهول
زي زمان ... وفي جتينة الأورمان نمشي تحت الشجر جنب
الأنايه ، ولما تتعبى أفرش لك منديلي وأعد جنبك ... !

حسنية هانم : ونسلى بالعنب ، ونحكي له بعض حكايات ..
مؤنس بك : واسمع ضحككتك اللطيفه .. (بعزم شديد)
صحيح كل شيء يتجأ إذا كان الانسان عاوز يتجأ ..
حروح مصر يا حسنيه : وحضر حفلة ميلادك !

حسنية هانم : (في ابتهاج وحماس) حبيبي مؤنس !
(محتضنان ... ولكن لا يكادان يفعلان حتى يفترقا)

على أتر سماعها صوت عوضين)

عوضين : (داخلًا في ضجة وصخب ، وهو فرحان)

سيدي ... سيدي ... البشارة !!

مؤنس بك : (متضايقا) جرى إليه ؟

عوضين : أبو شوشه أكل عليته !

مؤنس بك : (مبتهجا) أكل عليته ؟ صحيح ؟!

عوضين : ما خلاش حباية تبين أذّ كده !

مؤنس بك : (لحسنية هانم) تعالى يا حسنيه روح نشوفه ..

حسنية هانم : (في خيبة أمل) روح انت ، وأنا حسنتناك هنا !

(مؤنس بك يخرج جاريا ، وخلفه عوضين ... حسنية

هانم تروح وتجيء في الغرفة مغيظة ، تأخذ جريدة تنظر

فيها ، ثم ترميها في حركة عصبية ، يدخل ظاظا بك وهو

ثمل قليلا . يتجشأ ...)

حسنية هانم : لحت تشوف الأطيان ؟

ظاظا بك : أطيان ؟!

حسنية هانم : الناظر كان مستنيك بالركايب علشان يفرجك

على الزراعة ...

ظاظا بك : والله لسه مارحتش !
حسنية هانم : أمال جايّ منين حضرتك ؟
ظاظا بك : من الجنينة ! ... الهوا سَـطَلنى ، أمت خت لى
تعسيلة تحت تكعيبية العنب !

حسنية هانم : (وقد اشتبهت فى أنه شرب من العرق
مع عطوة باشا) تعالَ ... تعالَ ... كده ... كده ...
أرب لى شوية ! (تشم فيه) يعنى برضه شربت معاهم
وما سمعتش كلامى !

ظاظا بك : شربت لموناته !
حسنيه هانم : اخص عليك وعلى وشك ، راجل ماتتدرش
تحافظ على كلمتك

ظاظا بك : طيب وراس أبوك الغالى ما شربت غير اللوناته ..
حسنية هانم : أنا آلت لك ميت مرة ماتخلفش براس أبويا ..
أيسح ، أليل الأدب ... طيب استنه انت بس لما تروح مصر !
ظاظا بك : يعنى ... ناويا لى على نيه ؟ !

حسنيه هانم : نيه سودة على دماغك !
ظاظا بك : ياسلام يا حسنيه بس لما تفورى ديمك من
غير لزوم !

(يدخل عطوة باشا والشيخ غندور وهما يضحكان)

عطوة باشا : (للشيخ غندور) الله يجازيك يا أستاذ !...
بأ اللو كده ؟ (يضحك)
ظاظا بك : ألو إيه ؟

حسنيه هانم : (وقد تقدمت من عطوة باشا) بردون
يا باشا حسالك سؤال واحد ، أحب تجاوبني عليه بصراحة تمام ..
عطوة باشا : سؤال ؟ اتفضلى !

حسنية هانم : ظاظا شرب من العرئى ولا لا ؟
عطوة باشا : والله بس ، المسألة يعنى ... !
ظاظا بك : عاوزة الحأ بآ ... أنا نأ نأت شويه فى المزة ...
بس المزة ! ... اللوناته ما كانش فيها سكر أبدا ، كانت حاميه
على جوفى ... !

الشيخ غندور : (لحسنية هانم) أوكد لك يا هانم إن
سوء النية ما كانش موجود عند ظاظا بيه ... مسألة سوء تفاهم
بين الكبايات وبعض : بين كباية اللمون وكباية العرئى !!
حسنية هانم : (تصرخ مناديه من النافذة) يا عوضين ..
يا عوضين ... (يحضر عوضين على عجل ، حسنية هانم
تشير إلى ظاظا بك وتقول :) اليه عاوز يركب علشان يشوف
الأتبان بس عاوز يلف على الزراعة كلها من أولها لآخرها ...
عوضين : حاضر ...

حسنية هانم : (لظاظا بك) اتفضل يا بيه ا

(ظاظا بك يخرج ، وهو غضبان منتفخ الأوداج)

الشيخ غندور : نشوف وشك بخير ! ...

(عطوة باشا والشيخ غندور يضحكان ، ثم يقصدان

مع حسنية هانم إلى النافذة ينظرون منها . بعد قليل يصيح

الشيخ غندور وهو يلوح يديه :)

الشيخ غندور : مع السلامة يا بيه ... مع السلامة ... !

(عطوة باشا والشيخ غندور يضحكان)

حسنية هانم : (لعطوة باشا) أظن يا باشا انت فاكر ...

الدعوة بتاعى بعد بكره ... حجتيفل بعيد ميلادى !

عطوة باشا : روى حاجة تستنى ؟

الشيخ غندور : دنا كاتبها فى الأجنده !

حسنية هانم : حجتهد تكون حفلة توافى زوء كم

صحيح ... أنا كنت بكلم صدفه مع مؤنس بيه عنها فشفت

له نفس يحصرها ، أمت عزمته ...

الشيخ غندور : شىء بديع !

عطوة باشا : (لحسنية هانم) الحثيثة أن حضور مؤنس بيه

الحفلة اللى حتمليها- يعد حادث كبير فى المجتمع المصرى ،
لأنه أطع صلته بمصر واللى فيها من مدة طويلة !

الشيخ غندور : دا حتى الحفلة بتاعت الجامع مارضيش يجيها!
حسنية هانم : يظهر انه زهؤ من الأرياف وعيشة الأرياف
عطوة باشا : باين كده ، لأنه سحب نفسه من المعرض
الاقليمى بتاع كفر الريان ، شىء ما كانش الانسان يسدؤه !
(يدخل مؤنس بك مبتهجاً)

مؤنس بك : هتوني يا جماعة هنونى ... !
الشيخ غندور : ألفين مبروك ... ولكن على إيه بأ ؟
مؤنس بك : أبو شوشه طاب !

عطوة باشا : (يتقدم نحوه ويهز يده) أوه ... عظيم
جداً .. مبارك !

مؤنس بك : لما شفته الصبح ، كان مسكين ، حالته
عبرة ... عنيه جمره ، وبتدمع ، وجلده مأ نقد . ما كانش عاوز
يبص لى . ما تؤلشى زعلان معايا ... ! فعملت له الاسعافات
اللازمة فى الحال ، ولكن ماخيش عليكم كنت مشتبه فى أن
عنده حمى خبيثة ... ودلوأتى لما رجعت له لثيته واكل عليه
ومزأطط وعنيه ماشاء الله مفرجلة ويبص لى وييدحك ! ...
حسنية هانم : (فى سخرية ، ضاحكة) هىء ! ييدحك !

مؤنس بك : آ والله يا هانم بيدحك ، وشه منور ، متيجو
تفرجوا عليه ... فيه مانع ؟

عطوة باشا : ما فيش مانع أبدا ... يا الله !

(يخرجون ... حسنية هانم بيدو عليها التبرم ... بعد
قليل يدخل ظاظا بك من الباب الأيسر ، في حذر ، خشية
أن يلتقي بأحد . ينظر يمنة ويسرة)

ظاظا بك : ما فيش حد ، الحمد لله ! ... (يحفف عرقه

بالمنديل) آل ألف الأطيان من أولها لآخرها ! ليه ؟ هوانا
على ذنب ؟ (تدخل في هذه اللحظة برجسة حاملة صينية

فطير ذرة ، ملفوفة في فوطة) أهلا وسهلا ببرجسة هانم !

(تداعب أنفه رائحة الفطير) الله ... إيه اللي شايلاه ده .

برجسة : صينية فطير دره ، عاملينها لعطوة باشا ... حياخذها .

ظاظا بك : صينية فطير درة ؟! وربني كده وربني !

(برجسة تكشف عن الصينية وتدنيها منه ، فيشمها

في تلذذ)

ظاظا بك : الله ... دى حاجه أبهه أوى ... (يتلمظ)

برجسة : دنا اللي عملتها ...

ظاظا بك : (بحماس) إكبتها كويسه كده... والله
الفطير الدرہ دہ غلی فی عینی أوی !

برجسة : (تضحك في دلال) اتفضل !

ظاظا بك : یعنی آخذ منه حتہ ؟

برجسة : وماله ؟ اتفضل بالهنا والشفا ...

ظاظا بك : (یمد یدہ ویلتهم قطعة ، ویتمکم وهو

یلو کھا فی فمہ) هو یعنی حیا کھا کھا ؟ !

برجسة : دیهدی ... نعمل له غیرها ...

ظاظا بك : (وهو يتناول قطعة أخرى ، ویدسها فی فمہ)

یاسلام علی الأکل الفلاحی دأ ، وبالأخص لما یكون من إید
واحدة زیک !

برجسة : أکل فلاحی !... أکلکم أحسن من أکلنا کثیر

ظاظا بك : (وهو منهمك فی الأکل ، وقد وضع الصینیة

أمانه ، وشمر کیمه) تجی أکل مصر ؟

برجسة : (متحمسة) أحب مصر وأکلها وناسها وعیشتها

... أحب کل شیء فیها !!

(ظاظا بك يرفع رأسه عن الصينية ، ويحديق في
برجسه مفكرا)

ظاظا بك : وعوضين ؟ مش حتتجوزيه ؟
برجسة : أجوزه ؟ فشر ... أنا أجوز الفلاح التت ده !!
ظاظا بك : يمكن أهلك يجبروكي تتجوزيه !
برجسة : أهلي ؟ ماليش أهل ...
ظاظا بك : لا أب ، ولا أم ، ولا أعمام ، ولا ...
برجسة : (متظاهرة بالحسرة) يتيمة ، ومأطوعة من الدنيا !
ظاظا بك : لاحول الله ... معلش ... (يقول في
اهتمام ...) ربنا يعد لها لك ... اسمعى ... اسمعى ... (يريد أن
يقول لها شيئا ، ثم يراجع نفسه) لا ... مفيش حاجه ...
(يفكر طويلا)

برجسة : أَلَمْ الصينية ؟
ظاظا بك : (وهو شارد الذهن يفكر في موضوع
آخر) أيئوه ... ليها ... (يظل على حاله يفكر ، برجسة
تلف الصينية في القوطة كما كانت ، وتنهيا للخروج .

عندما تصل إلى الباب يستوقفها (اسمعي ...) يقفز إليها
ويقف أمامها لحظة ، وهو يحدق فيها ، ثم ينحني بفتة
على خدها فيقبلها قبلة جامعة ...)

برجسة : (مسرورة ومتظاهرة بالغضب) كده برضه
يصح ؟ إخص عليك !

(ظاظا بك ينحني على أذن برجسة ويسر إليها حديثا .
برجسة متلهة ومقتبطة)

برجسة : والنبي صحيح ؟!
ظاظا بك : طبعا صحيح ... تعالى ! تعالى !
(يخرجان معا من الباب الايسر . يدخل مؤنس بك
وعطوة باشا وحسنه هانم والشيخ غندور)
مؤنس بك : هيه ... إيه رأيكم بأ ؟
عطوة باشا : عجل عظيم ! (مسح عينه بالتمديد لاخراج
حصاة منها) .

الشيخ غندور : ماشاء الله ملظظ أوى ... أوى ... إوع
تفرج عليه الجزارين لحسن يسرءوه منك ...

(مؤنس بك وعطوة باشا يضحكان)

حسنية هانم : (بهكم) ولكن مال شويشته كده عاملة زى

المنشه ؟ !

مؤنس بك : منشه ؟ دى شويشته دى يا هانم سر جماله !

(عطوة باشا مهمم بمسح عينه)

حسنية هانم : مال عينك يا باشا ؟

عطوة باشا : حصوة صغيرة مدّيانى ... مش عارف جت

لى منين !

حسنية هانم : أهى دى سآلة الأرياف !

مؤنس بك : (لعطوة باشا) تحب تغسل عينك تحت الحنفية

عطوة باشا : مفتكرش ضروري ...

(يدخل عوضين)

عوضين : حضرة الباشا المدير باعت واحد مراسله ييثول

لسعادتك فين الحاجات اللى حتودّديها المعرض ؟

مؤنس بك : (فى تحمس) أيوه ، أآله بكره حبيبتها .

(يتهمأ عوضين للخروج ، مؤنس بك يستوقفه) اسمع .

أنا عاوزك تاخذ بالك من الجوز الفراخ الاسكوتلاندى والحمام

الهزاز ، و كان ماتنسا ش بيض الوز ... (يلتفت إلى الجمع)
والله لو شفتم بيض الوز دا لاتثولوا عليه بيض نعام !

(يخرج عوضين)

الشيخ غندور : بيض نعام ؟

مؤنس بك : من غير مبالغة يا أستاذ !

عطوة باشا : وبزرة الأطن الجديدة بتاعتك ... مش
حزنشوفها ؟

مؤنس بك : مؤكد ... إذا حببتيتم اتفضلوا دلوا تي ...
عطوة باشا : مفيش مانع .

حسنية هانم : (لمؤنس بك يبرود) والله لا مؤاخذه يا ييه

الزيارة بتاعتنا طالت شو يه ... (لعطوة باشا) أظن يستحسن
نرجع أ° بل المغرب يا باشا ؟ ...

عطوة باشا : زى ماتستحسني ... !

حسنية هانم : وبالأخص لان عندي شغل بمناسبة عيد
ميلادي بعد بكره .

مؤنس بك : (لحسنية هانم وقد ضرب يده على جبهته)

أوه بعد بكره ؟ راحت من فكري المسألة دي (يصرخ بغیظ

مناديا) يا عوضين ! يا ...

حسنيه هانم : (مقاطعة لآياه) علشان إيه بتنده له ؟
مؤنس بك : أنا وعدتك يا هانم أحضر الحفله فيصبحش !
حسنيه هانم : أوه ! لا . لا .. ماتضيعش المعرض علشان
حفلتي ...

مؤنس بك : إزاي ؟ دا مايجيش !
حسنية هانم : (بعزم ثابت) مستحيل . أنا متشكرة أوى
على كل حال !
مؤنس بك : أمرك ! والله أنا كنت أحب أكون معاكم
أوى ... !

الشيخ غندور : معلش المرة دي . الحفلات برضاها كثير
ومش حنعتك منها ..

حسنية هانم : (تأثرة الأعصاب) وفين دلواتي ظاظا ؟
يعنى لازم يجبكها ، ويروح يتفرج على الأطيان ؟ !
عطوة باشا : ابعثوا واحد فلاح يروح يجيبه من القبط
(يعود لى مسح عينيه باهتمام) لا مؤاخذه . تسمجوا لى أغسل
عيني لحسن الحصوه مديآني أوى ؟ ...

(يخرج عطوة باشا من الباب اليسر ، فيدخل عوضين
من الباب الايمن وهو في أشد حالات الانزعاج والثورة)

عوضين : سيدى ! سيدى !

مؤنس بك : مالك ياواد ؟

عوضين : الراجل اللى اسمه ظاظا بيه أخذ البت برجسة
معاه فى التتميل و هرب !

حسنية هانم : هرب ؟ هرب ازى ؟ !

عوضين : و حياء راسك ياست هرب . كل الفلاحين شافوهم
فى التتميل طارين زى الفريرة ... آه بنت المركوب دى
بس لما أشوفها ! ...

حسنية هانم : (فى اهتياج) طيب يستنا الأهل المغفل
دا . جيبولى الاتمیل التاني أوام !

(تخرج كالعاصفة وخلفها مؤنس بك وعوضين ...

الشيخ غندور يتهاك ضاحكا على المقعد . يدخل
عطوة باشا ووجهه مبلل يحففه بالقوطة)

عطوة باشا : مين هو اللى هرب ؟ العجل أبو شوشة ؟ !

الشيخ غندور : لا يساعد الباشا ... اللى هرب عجل تانى ،

تعال نشوف المسألة إيه !

(يخرج جان . بعد قليل تدخل يسرية وخلفها أم سريع
من الباب الأيسر)

يسرية : إيه الكركبة دى يا أم سريع ؟ الدنيا مألوبة إيه ؟
أم سريع : والله ياسق علمسى علمك ... سامعاهم ييشولوا
هرب ، هرب ، مانيش عارفه مين دأ اللى هرب ؟!

يسرية : ومين دول اللى مع البيه بره ؟
أم سريع : دأ عطوة باشا بتاع كفر الزغبة ، جه هو وناس
معارف معاه عشان يزوروا البيه ، ويتفرجوا على عزبته ...
منحأ ازى نيتك ؟

يسرية : والله تعبانة يا أم سريع ... كان حشى إبات
معاها الليلة ، بس ألت يمكن البيه يكون عاوزني في حاجة ...
أم سريع : عملتى طيب برضه ... دى مزرعة الدواجن
ماحدش يعرف فيها غيرك . وحاسيبى حليب الجاموس لين ؟
لام ابراهيم الستوهاجية ترط رط لك الدنيا ؟ منحأ ماتش عارفه ؟
يسرية : إيه ؟

أم سريع : أبو شوشه أكل عليته ، وربنا أخذ بيده !
يسرية : (بفرح) والنبي ! ... ربنا يبشرك بالخير ...
دا البيه كان زعلان عليه أوى ! ! !

(يدخل مؤنس بك ..)

مؤنس بك : (غير منته لوجودها) أف ! إيه ألبه
الدهاغ دى ؟ ! (يقع بصره على يسرية) الله ! إتنى هنا ؟
(يذهب إليها ويحوطها بذراعه) جيتى إمتته يا حبيبتى ؟ !
أم سريج : (خارجة) ربنا يحميمكم لبعض ، ولا يورينا
وحش فيكم أبدا ...

يسرية : يادو بك جيت دِلو آتى ...
مؤنس بك : (يجلس معها على المتكأ ، وذراعه حول
خصرها) هيه ... مش اطمئننى على نينتك ؟
يسرية : الحمد لله ... برضه شويته تعبانه ...

مؤنس بك : شوية برد بسيطة ... مش حاجه ... إلا
أوليل ، رأيك إيه فى الجوز الفراخ الاسكتلاندى ... مش
يليثوا نعرضهم فى المعرض ؟
يسرية : يليثوا ؟ هو فيه زيه فى مصر كلها ؟ ... ماتنساش
تودى كان الحمام الهزاز ...

مؤنس بك : عليك نور ...
يسرية : والأرنب الجبلى اللي مسميه أراءوش ...
دا ماشاء الله أدّ الأوزى ... !

مؤنس بك : أوه ، أراءوش ... والله كنت ناسيه !
يسرية : وأبو شوشه ؟

مؤنس بك : خلاص ربنا أخذ بيده ... وحيكون على
راس المعروضات كلها ... ماتنسيش منحأ اتنا حنرض عدة
أصناف من الزبد والجبنه ...

يسرية : أنا دلوأتي آيمة احضر حليب الجواميس ...
مؤنس بك : كنت كلمتيني على نوع جبنه جديدة عملتها...
فين هي ؟

يسرية : مادوأتها لك ، ما عجبتكش !!
مؤنس بك : أومي جيبها لي كده أدوءها ثاني ...
(تخرج يسرية وتحضر له الجبن ... مؤنس بك يتذوق
قطعة منه)

مؤنس بك : متأكده ان الجبنه دي هي نفسها اللي دواتها لي ؟
يسرية : والنبي هي مافي غيرها ؟

مؤنس بك : دي جبنه عظيمه أوى ... (يلتهم قطعة)

يسرية : بس ناءصة شوية ملح ؟!

مؤنس بك : بالعكس دا هو السر في كونها كويسة ...
والله الجبنه دي لوما أخذتش الدرجة الأولى أأطع دراعي ...!

(يضع طبق الجبن جانباً ، ويقف أمام يسرية يحقق
فيها بحنان ، ثم يبتأنف الكلام ...)

مؤنس بك : فيه مسأله بدى آخذ رأيك فيها ...

يسرية : تاخذ رأيي أنا ؟
مؤنس بك : الأطن الجديد اللي استنبته معرفتي ما لئيتيش له إسم ؟
يسرية : عاوزني أدور لك على إسم له ؟
مؤنس بك : ماتنسبش اننا حنأدم عينه منه بعد بكره في
المعرض . هيه ، شوفي لى كده اسم يوافي !
(كل منهما أمام الآخر ، مؤنس بك يضع كلتا يديه
على كتفها)

يسرية : (مفكرة) نسميه ... نسميه ...
مؤنس بك : نسميه الأطن اليسرى ... والبزرة اليسرية ...
يسرية : (مدهوشة ، يبدو عليها الشك) على إسمي ؟ ...
(تحديق يسرية في مؤنس بك طويلا ، تخفي وجهها في
صدره متأثرة ، يضمها بشغف إليه ، ويقبلها قبلة طويلة)
أم سربع : (وهي قادمة من الخللج) أبو هجرس جاب
الجواميس الحلاية ياسق ... (تدخل ...) أبو هجرس جاب
الجواميس ... (تراهما متعانقين كل منهما يقبل صاحبه ،
فتقطع كلامها وتراجع . تعود من حيث أتت وهي تقول
مغمغمة :) ماجبش حاجه ياسق !! ...

ستار الختام

انتهت

المؤكَّب

كوبيرة منه فصل واحد

أشخاص الرواية

فضل الله باشا : الزوج ، ورئيس الاسرة ، ٦٠ عاما ،
كان فلاحا واستوطن القاهرة . دقة قديمة .

قطيرة هانم : زوجته ، ٤٥ عاما ، مريحة طروب . من
أهل القاهرة .

زهيرة هانم : ابنة فضل الله باشا من زوجته الأولى
الفلاحة المتوفاة ، ٣٥ عاما متحفظة كأبها .

بريع بك : زوج زهرية هانم ، متحفظ كفضل الله باشا
٤٠ عاما .

بشائر هانم : الابنة الصغرى ، ١٦ سنة ، مريحة كأبها .

صفر بك : ابن فضل الله باشا . فتي العصر الانيق ، ١٨
سنة ... من طلبة الجامعة ...

السبح كروانه : شخص مجذوب ومهرج .
وشخصيات أخرى

(المنظر حجرة جلوس بمنزل
فضل الله باشا. لها شباك كبير مستطيل
مظهر الحجرة يدل على اختلاط في
النوع بين القديم والحديث .
فبينما ترى صورة فنية من النوع الرمزي
معلقة على الحائط تجذب مجوارها لوحة
مكتوب عليها «الحلم سيد الأخلاق» أما
الأثاث فخليط من المقاعد والمتكآت
بين عصري وقديم ... عندما ترفع
الستارة يشاهد الباشا جالسا على متكأ
من طراز قديم عليه سجادة من الصوف
الأحمر ، من الصناعة المحلية . الباشا
مرتد جلبابا وعليه عباءة . تغطي
رأسه قلنسوة من الصوف . بجواره

آلة الرديو . يستطيع في سهولة أن
يشاهد في جلسته ما في الشارع من
المنظر. الباشا متربع ، وأمامه على المتكأ
صينية بها بقايا طعام ، وعلى صدره
فوطه حمراء من صنع المحلة . في
الحجرة مرآة

الباشا : (غاضبا وهو يصيح) يا ولد يا نعيم ! فين الحلو ؟

نعيم : (من الداخل) حاضر يا سعادة الباشا .

الباشا : (صارخا) باشا في عينك ما تجيب يا واد بأه !

نظيره هانم : (تدخل حاملة طبقا فيه فاكهة مطبوخة)

بس إذا ما كنتش تزعمأ كده !... أدبني جبتلك الحلو بنفسى !

الباشا : (وهو ما يزال مهتاجا) وأنا هضمت خلاص !

(ينظر في الطبق) الله ! إني جايبالى إيه ??

نظيره هانم : خشاف ؟

الباشا : خشاف ! هو أنا عيّل صغير أدامكم والايغنى إيه ؟
فين البتاعه اللى بيثولوا عليها السطرطه اللى عامله زى الحلأوه
الجوزيه ..؟ أظن ما يعنى .. (يمر بيده على فمه فى حركة تفقيد
الهم) شفقّوها !

نظيرة هانم : شفقّناها إيه ؟ إنت النهارده لخبطت فى الاكل
أوى ومأدرش أدبك من الطورطة ..
الباشا : إزاي ده ... وراس أبويا الغالى لازم آكل من الطرطة .
(يشير بيده إشارة تهديد . فيشعر بألم حاد فى جنبه)
نظيرة هانم : هه . أدبك شايف ياسيدى ، مش بتشكى
بكبدك ، وعندك مكان روماتيزم وعرق النساء . والحكيم منه
عليك ماتكولشى الحاجات الثيله ؟

(يسمع صوت موسيقى فى الشارع . هرج ومرج ،
وهتاف بحياة جلالة الملك والأمير القادم . ينظر فضل الله
باشا ونظيرة هانم إلى الشارع ويستمعان . تبسط أسارير
الباشا . يتناول طبق الفاكهة المطبوخة ، ويأكل منه وهو
يصنع . تهرع إلى الحجرة فى هذه اللحظة بشاير هانم وأخوها
صفر بك ، ويجريان كطفلين إلى النافذة لينظر إلى الشارع

يمسح كل منهما فمه بفوطته ، صفر بك بدون سترة . تعزف
الموسيقى لحنا من الألحان . وينشد الموكب نشيدا من
الأناشيد القومية)

صفر بك : أما موكب مدهش (يلتفت إلى أيه) دول طلبة
الجامعة يا بابا ماشيين في شكل عرض (يهلل لأحد إخوانه طلبة
الجامعة) برافو ! برافو ! (يلمح زميلا له) أوه ، فتحي !
شد حيلك ! امسك العلم كويس ... أنا جاي لكم كمان شويه .
بشار هانم : (تهلل وتصفق قائلة) برافو ! برافو !
الباشا : (لبشار هانم) ما تدلّ ليش من الشباك كده
أدام التلامذه . عيب .

بشار هانم : عيب إيه يا بابا ؟
نظيره هانم : بأ معنى عيب كان انها بتفرج من الشباك ؟
مش كفايه حكيت علينا نتحبس في البيت في يوم زى دا ؟
(صفر بك منهمك يتفرج ، لا يلتفت إلى شيء من
الحديث صوت الموسيقى والضجة يتضاءلان رويدا رويدا)
الباشا : (وهو يمسح فمه على أثر انتهائه من تناول)

القاهرة المطبوخة) أنت عاوزه ترجعى تانى للحكاية من أولها؟
نظيرة هانم: أولها إيه وآخرها إيه؟ هو احنا يعني طلبنا
حاجة ماتطلبشى؟ دى الدنيا كلها رايحة تتفرج على موكب
الأمير وهو جاي من المحطة!

بشار هانم: (تقفز أمامه فى ظرف وزجاء، قائلة:)
والنبي يا بابا، والنبي يا بابا خيلنا نروح!

الباشا: (يصرخ) أنا كلمتى واحدة، مافيش خروج من
البيت النهارده!

نظيرة هانم: طيب! طيب! بس إن ماكنش نزعاً
تملى يا بابى!!

الباشا: معلوم، عاوزين تخرجوا فى يوم زى دا علشان
ماتزحموا فى وسط الرجاله!

بشار هانم: رجاله إيه يا بابا؟ إيه الكلام دا؟

صفر بك: (يلتفت إليهم) إيه الحكاية؟... (يفهم)

الموضوع) آه المسألة أياها. حتملوا إيه مادام بابا محبكم أوى!

(الرديو مفتوح)

الذيع: (فى الرديو) هنا القاهرة. سيداتى. آنساتى.
ساداتى. هنا المحطات الرئيسية للاذاعة الحكومية المصرية.

نتشرف بأن نعلن للجميع أننا سنتولى إذاعة وصف مشاهد
الاحتفال بتشريف صاحب السمو ضيفنا الأمير العظيم .

الباشا : خلاص ، حينئذ صمكم إيه مادام الرديو حيوصف
لكم كل الاحتفال من طأطأ للسلام عليكم . اشمعنا يعني الناس
بيسمعوا في الرديو أخبار أوروبا وأمريكا وينبسطوا منها ؟
هم يعني راحوا شافوها ؟!

(نظيرة هانم وابنتها بشاير عابستان ... صفر بك
يأخذ سترته البونجور من الكرسي ويرتديها . يصلح
هندامه أمام المرأة)

الباشا : دارأى صهرى بديع ييه كان (يلتفت حوله)
هو فين منحا ؟

نظيرة هانم : (بهزؤ وسخرية) محسب بالنبي صهرك بديع
ييه . نفسه مفتوحة أوى النهارده !

صفر بك : (وهو مازال أمام المرأة) مش عاوز يتنثل
من أدام الطرطة . أهو عمال بيتول يانا ياهييه !

(بشاير هانم تضحك ضحكا عاليا)

الباشا : أنا عارف انكم غايرين منه . دا راجل بسوى تؤله
دهب . كمال وأدب وخشوا !

نظيرة هانم : أما صحيح ماغلطتش ياباشا فى الكلمة دى .
دا من أدبه وكلمه وخشوه مايرفعشى عينه حتى للفترينات
بتوع شيكوريل !
صفر بك : ليه ؟

نظيرة هانم : ينكسف من تماثيل الستات اللى ورا الازاز !
(بشاير هانم تضحك ضحكا عاليا)
الباشا : وبعدين يا بشاير !

(يدخل فى هذه اللحظة بديع بك ، وخلفه زوجته .
زهريه هانم ، وهى كريمة الباشا الكبرى من زوجته .
الأولى الفلاحة . يدخلان فى ملابس شديدة الاحتشام ،
ويسيران فى مشية متحفظة ، فتتضحك منهما نظيرة هانم .
وابنتها وابنها فى صوت مكتوم)

نظيرة هانم : (لابنها وابنتها فى صوت خفيض) مابجمع
الإلا ماوفا ... حأ زهريه هانم يا ولاد الخالى الناطىء المرحومة
امها أم السعد .

بديع بك : سُفرة دايمة ياسعادة الباشا .

الباشا : بالهنا والشفا يا بني !

(بديع بك يجلس على كرسى بالقرب من متكى

الباشا ... وكذلك تفعل زهرية هانم)

بديع بك : سعادتك حرمتنا من أنسك في النفرة !

الباشا : والله يا بديع بيه حببت ما أدري يشكش !

زهرية هانم : ياسلام يا بابا تدايتنا ازاي ؟

الباشا : يا بنتي . انا عيان ، وغلبتني كبيرة ...

المذيع : (في الرديو) هنا القاهرة . سيداتي . آنسائي .

سادتي . هنا المحطات الرئيسية . للاذاعة الحكومية المصرية .

نبدأ باذاعة وصف الاحتفال بتشريف سمو الأمير القادم . يصل

الأمير حفظه الله إلى محطة القاهرة في تمام الساعة الثالثة

(أفراد الأسرة ينظرون في ساعاتهم) وذلك بقطار خاص ،

وفي معيته الأمراء وكبار رجال الدولة . وقد بدأت المواكب

والطوائف تتحرك إلى طريق المحطة لتأخذ أمكنتها المعدة لها ..

صفر بك : دا احتفال حيكون مدهش . مدهش جدا ! !

نظيرة هانم : حسره علينا !

الباشا : حسرة إيه وبتاع إيه ؟ ما ألتيك حاتسمعي

الاحتفال كله من الرديو . احمدى ربنا ان عندنا رديو ...

(بشاير هانم متضايقة : تمض بأسنانها على منديلها ،

وتشده بيدها . نظيرة هانم تتميز من الغيظ)

بديع بك : الباشا له كحاً .. حانسمع كل الاحتفال من الرديو .

(يلتفت إلى زهرية هانم زوجته ويقول :) مش كده يا هانم ؟

زهرية هانم : تمام يا بيه !

صفر بك : (وهو منتح مع أمه وأخته جانبا يقول مقلدا

لهجة بديع بك بسخرية) مش كده يا هانم ؟

نظيرة هانم : (تجيبه بالهجة زهرية هانم ضاحكة) تمام يا بيه !

(تفلت من بشاير ضحكة عالية)

الباشا : (لبشاير هانم غاضبا) عاوزه يعنى تسمى حسك

على في الشارع ؟

نظيرة هانم : ما تؤعُدش تنكد على البنت بأه . كفاية نكد !

(يدخل نعيم الفراش بالقهوة ، ويبدأ يوزعها على

الحاضرين . كل يأخذ فنجانا ، إلا بشاير هانم بطبيعة الحال

لصفر سنها)

صفر بك : (يميل على نعيم) إلا طمّنى يا نعيم على

الطرطه ... هيه ؟

(نعيم يأتي بحركة يأس)

صفر بك : البَيْتَةُ في حياتك يا نعيم . مَعْلِيْش ! (الباشا)
أنا مش داخل تُخْنِي يا بابا ليه مش عاوز أبدا تخلّي ماما وبشابر
يروحووا يتفرجوا على الموكب النهارده . دى فرصة فريدة.
من نوعها !

الباشا : يعنى مش عارف ياسى صفر ليه مش عاوزهم يروحوا ؟
صفر بك : مش خايف عليهم من الزحمة ؟ ولكن دول
حيكونوا معاى . حنركب الأتمبيل سوا من باب البيت لغاية
الكوئنتنثال . وهناك نطلع سوا على التراسينة اللى مأجّرِها .
فين بآ الزحمة والناس والكلام الفارغ ؟

(بديع بك يضحك ضحكة هزوّ في تحفظ ووقار ،
فيضحك الباشا بعده . صفر بك يتابع قوله :) طبعاً حيكونوا
معاى . معايي أنا . هو أنا يعنى مش مالى عينكم ؟ !

(بديع بك يضحك أيضاً ضحكته المعروفة)

الباشا : (لصفر بك) مش مالى عيننا ازاي ؟ حنركبوا
طبعاً الأتمبيل سوا ، وتروحوا على الكوئنتنثال سوا ، وتلم
معاك أصحباك — الشلة بتاعت الجامعة — وتؤعدّوا كلمكم
سوا . . . وهات يادحك ودرّدشة سوا ، وشرب أهوم
وسجائر سوا . . . !

زهرة هانم : إنت مش عاوز الحاً يا صفر بيه ؟ أنا
مايعجبنيش كده . مايصحش تعرف بشار لحد ؟
صفر بك : آه . لا مؤاخذه يا أبلة . أظن مش عاوزة
تطلعي بشار زيك تلبس حبرة وبرؤع . وما تخرجش من
باب بيتها إلا مرة في الشهر !

بديع بك : أظن يا صفر بيه المسألة مفهومة أوى : سعادة
الباشا شرح لكم الأسباب اللي خلتها ما يصرحشى للست نيتك
وأختك بالخروج للفرجة . والأسباب اللي أبداهها سعادة الباشا
معتولة جدا .

نظيرة هانم : (لبديع بك) أيوه ياخويا معتولة أوى !
خلاص ، مش حافتح بؤنا بالسيرة دى !!
(بشار هانم تشد منديلها بأسنانها)

الذيع : (في الرديو) هنا القاهرة . سيداتي . آنساقى .
سادتي . هنا المحطات الرئيسية للاذاعة الحكومية المصرية .
الساعة الآن الواحدة والنصف تماماً . (أفراد الأسرة ينظرون
في ساعاتهم) باق على تشریف سمو الأمير ساعة ونصف ...
الحكمدارية تنصح للجمهور بالمحافظة على النظام ، وعلى كل
طائفة أن تحتل مكانها المعد لها بلا شغب ولا صياح ...
صفر بك : (يلتفت حوله يبحث عن شيء) أنا لازم

أروح بأ... لحسن الوأت أرب... الله! فين طربوشى ؟
(بشاير هانم تأتى له بالطربوش ، تمسح عينيها . وهى
حزينة . صغربك يقف أمامها يلاطفها فى محبة)

نظيرة هانم : (تقول بحسرة ، وهى تبتسم ابتسامة
اليأس) أبأ يا بنى جيب لنا حبة فرجة فى جيبك !!

صغربك : (يلاطف والدته نظيرة هانم ، ثم يلتفت إلى
أبيه ثاراً ، وهو يقول) والله يا بابا مالكشى حأ . بأ يعنى
علشان ما انت غيان ، ومش آدر تروح تنفرج ثوم تحبس .
جنبك ماما وأختى ، وتحرمهم من الفرجة الهائلة دى ؟ لا . لا .
لا . انت فى الحديقة إيجويست !

(يتجه إلى الباب لأخذ طربوشه)

الباشا : (غاضباً) جويست ... جويست يعنى إيه ؟ آدى
اللى فلتحت فيه فى الجامعة !

(يميل على بديع بك ، ويسأله بصوت خافت)
جويست يعنى إيه ؟

بديع بك : (متردداً) يعنى ... يعنى ... يعنى يحب روحه

الباشا : (لصفر بك) يعنى بأه أنا ظالم ومستبد ؟
(بينما صفر بك مشغول ، يتهامس مع أمه وأخته ،
إذا بديع بك والباشا يتحدثان بما يأتى :)
بديع بك (للباشا يهدئه) مش أصدده تمام ظالم ومستبد
إنما يعنى ...

الباشا : ولد أبيض ماتر باش !
زهريه هانم : دى فلتة لسان يا بابا ...
بديع بك : ياخى دا الواحد يحمى ربنا برضه . دا صفر
بيه يعد مَلاك لو قارتاه بشبان الأيام دى ...
الباشا : واهو همّ دول اللى بيثولوا عليهم الشباب الناهض
جويست آل ! ... جويست ؟ !

(يتناول الباشا بقية ما فى الطبق من الفاكهة المطبوخة
فى نهم شديد ، كأنه يطفىء غضبه ... ثم يلتفت إلى بديع
بك وزهريه هانم ، متحدثا إليهما بصوت غير مسموع .
صفر بك يتكلم مع أمه فى جانب آخر من الغرفة)
صفر بك : (بصوت منخفض) طيب واللى يخلىكم
تطلعهم النهارده تفرجوا على الموكب ؟

نظيرة هانم : والنبي صحيح ؟ !

(بشاير هانم مهتاجة من الفرح ، تصفق بيديها طرباً
صفر بك : لا . حاسبي امال . لحسن ياخذ باله .

بشاير هانم : (تكتم عواطفها وتقول :) طيب... طيب
ولكن حتمعل إيه ؟

نظيرة هانم وبشاير هانم : (بصوت عالٍ معاً) إيه ، لئيت حاجه
الباشا : إيه اللي لئيته ياسي جويست افندي ؟

صفر بك : (ينحنى على الأرض ، مؤهلاً الباشا أنه
يلتقط شيئاً) أيوه لئيت الزرار...

بديع بك : (متمماً حديثه مع الباشا) واخذ بال سعادتك
الولد من دول ياخذ مصاري ف المدرسة ، ويحطهم في جيبه ويضرب
عليهم عوافي !

(بديع بك يتابع حديثه بصوت غير مسموع)
صفر بك : (لأمه واخته على حدة) أنا كنت سامع
بيثولوا ان علوية هانم جارتنا حرم عبد الغفور بيه ، حتولد
اليومين دول ...
نظيرة هانم : ميعادها بعد جمعتين ...

بشار هاتم : بعد جمعتين ولاّ بعد شهر . إيه اللي دخل
ولادتها في الفرجه ؟ !

(يتهايس الثلاثة : صفر بك ، ونظيرة هاتم ، وبشار
هاتم ثم ينظر بعضهم إلى بعض ... وينطلقون ضاحكين
مهلين)

الباشا : إيه الغلبة دي ؟ .. الله !
زهريه هاتم : مبسوطين ... ربنا يبسطهم ...
(يسمع تحت النافذة هرج ومرج . الشيخ كروان
يهتف)

الشيخ كروان : (من الخارج) أحرار في بلادنا كرماء
لضيوفنا !!

(صفر بك ونظيرة هاتم وبشار هاتم يهرعون إلى
النافذة ، والباشا يلتقي بنظره إلى الشارع ... أما بديع بك
وزهرية هاتم فلا يتحركان من مكانهما ، متظاهرين بالوقار
مع أنهما يذوبان شوقا إلى مشاهدة ما يجري في الطريق)
الباشا : دا الشيخ كروان المجدوب !
نظيرة هاتم : والنبي ياباشا انده له علشان ندحك عليه شويه

الشيخ كروان : (من الخارج) أحرار في بلادنا كرماء
لضيوفنا !

(الباشا يتسم ، ثم يشير بيده إلى ولده صفر بك الذي
يدنو حينئذ من الشرفة)

صفر بك : (مناديا) ياشيخ كروان... ياشيخ كروان
تعال ... !

الشيخ كروان : (من الخارج ، حين يلمح الباشا .
يصيح بأعلى صوته) فليحي فضل الله باشا المهول !... فليحي
رجل الساعة ... رجل الفضل والشهامة والكرم ...

(الشيخ كروان ينشد بالصفارة نشيدا ، فضل الله
باشا يشير إليه ليأتى)

الباشا : دا راجل خفيف الدم ، ويعرف إيمة الناس .

(ينتقل الباشا مع بديع بك إلى المقعدين الوسيعين .
على اليمين)

بديع بك : فيه شيء لله !
بشار هانم : دا حافض كل أغاني عبدالوهاب ، وأم كلثوم
ونادرة ... ويألدم لك تمام !

بدیع بك : ويعرف بذكر كويس أوى (الباشا) ماسمعتوش
سعادتك فى حلقة الذكر ؟

الباشا : لا والله يا بدیع بيه ماسمعتوش ؟

(يدخل نعيم الفراش ، ومعه الشيخ كروان . ملتصق
يلبس ملابس الدراويش القدماء ذات الألوان الزاهية
والطرطور الطويل)

الشيخ كروان : (للباشا) ماشاء الله ! ربنا يزيد ويبارك،
إيه الطلعة البهية دى : إيه النور الروحانى ذا اللى يفيض على
وجهك الكريم ... أقسم بالله ثلاثا - غير حانت ولا كاذب -
انك رجل هذا العصر الذى يشار إليه بالبنان !

صفر بك وبشار هانم ونظيرة هانم (يصفقون ويقولون)
برافو ! برافو !

(يتقدم الشيخ كروان من الباشا ، ويقبل يده فى
حركات مشعوذة ، ثم يسلم على الآخرين واحدا بعد واحد)
الشيخ كروان : تعرف يا سعادة الباشا ، والله شفتك امبارح
فى المنام !

الباشا : صادىء يا أخى ... وشفيت إيه ؟

الشيخ كروان : شفت انك راعنى يا صاحب السعادة ألم
على صدغي صحاني من النوم بـسُرخ ! (الباشا يضحك)
ولما سألت الشيخ عبد الرحمن الكتاتنى ، شيخى الكبير عن تفسير
هذا المنام ، قال لى وهو يتنسم : الألم فى المنام يا شيخ كروان
معناه خير كثير ... ربنا يخليك لنا يا سعادة الباشا ، ويطرح
البركة فى الذرية الصالحة... تعرف إيه الاخبار الجديدة يا باشا ؟
الباشا : إيه ؟

الشيخ كروان : الأخبار الهائلة !

الباشا : إيه هي بس ماتتول !

الشيخ كروان : العضويه يا باشا ...

الباشا : العضوية ؟ !

الشيخ كروان : بأ سعادتك ناسى العضويه ؟ !

الباشا : آه ... عضوية جمعية الرفق بالحيوان ؟

الشيخ كروان : حيوانات إيه يا باشا . : عضوية مجلس الشيوخ

الباشا : (يمنع الشيخ نقودا) خد يا شيخ كروان خد

الشيخ كروان : الله يطول عمرك يا باشا !

(يندفع الشيخ كروان يلتقى القصيدة الآتية ، وهو يلعب

وجهه ويتراقص . صفر بك ونظيرة هانم وبشار هانم

ونعيم الفراش يصفقون للشيخ كروان في كل مقطع .
الباشا مبتهج يضحك ... بديع بك وزهرية هانم ينسيان
أنفسهما بعض الوقت . فيشتركان في التهليل ، ولكن
سرعان ما يعودان إلى وعيهما فيلزمان وقارهما الممهود)

الشيخ كروان (يلقى القصيدة الآتية :)

يا أيها الباشا العظيم الشان
ياسيداً في العصر والاولان
يا زينة الأماجد الأعيان
وصدر كل مجلس ملبان
تسلم من هم على الزمان
وتسمع المديح من كروان
أنشده بصوتي الرنان

فيهتف الجميع بي « من ثاني »

الجميع : من ثاني ! ... من ثاني . . . !

(ينتهي الشيخ كروان من إلقاء الأرجوزة ، ويتقدم .

من الباشا ، فينقده العطية)

الشيخ كروان : فليحي فضل الله باشا ... فليحي رجل .
الساعة ... رجل الشهامة والمروءة والكرم !

(يمر في الشارع في هذه اللحظة موكب موسيقى ،
فيخرج الشيخ كروان يتراقص على النغمات ... الباشا
يؤخذ بعض الشيء بالايقاع فينشط قليلا ... صفر بك
مع أمه وأخته يتهايمسون ويدبرون المؤامرة ، بعد خروج
الشيخ كروان تهيأ صفر بك لترك الحجرة)
صفر بك : وأنا كمان طالع بأ... أورفوار يا بابا... أورفوار
عليكم كلام بأه... (يتجه ناحية الباب)

الباشا : (لصفر بك) الله ! تعال ... تعال ...

صفر بك : (يلتفت إلى أبيه) إيه ؟

الباشا : أنا ما خدتش بالي ... انت لا بس إيه ؟

صفر بك : لا بس إيه ؟ بدلة !

الباشا : بدله رسميه الظاهر ! (يقولها بسخرية)

(بديع بك يضحك ضحكته الوقور وزهرية هانم

تضع المنديل على فمها فتخفي ابتسامه السخرية)

صفر بك : معلوم بدلة رسمية ... أحروح الاحتفال ببده

غادة ؟ !

الباشا : (بهزؤ) أَرَب بس فرّجني . دى لا ردنجوت
ولا سموكن ... تبأ إيه ؟

بديع بك : دى اللي بيثولوا عليها ياسعادة الباشا : البدله أم ديل
الباشا : أم ديل ؟ !

(ينطلق ضاحكا ، ولكنه لا يلبث أن يتخفف من
ضحكه لشعوره بألم فى جنبه ، بديع بك وزهرية هانم
يشاركانه فى الضحك)

الباشا : طيب وما لبستش ليه كمان النياشين بتوعك على البدله
أم ديل دى ؟

(يضحك أيضا)

صفر بك : (وهو متضايق) دى يا بابا اسمها بدلة بونجور
وتلبس فى الاحتفالات الكبيرة ... أنا واحد أعرف الاتيكيت !
أورفوار !

(يخرج مشيعا بضحك الباشا وبديع بك وزهرية هانم)
(الرديو يتكلم . الكل يصغون بانتباه)

المذيع : هنا القاهرة . سيداتى ، آنساقى ، سادق ، هنا المحطات
الرئيسية للإذاعة الحكومية المصرية . يكرر سعادة محافظ القاهرة

وحكمدارها الرجاء إلى أفراد الشعب الذين سيحضرون تشریف
الموكب السامى أنت يحافظوا على النظام التام ، الساعة
الآن الثانية ...

(الكل ينظرون فى ساعاتهم) باق ساعة على وصول
القطار المقل لسمو الامير . بدأت المحطة تزدحم بالمستقبلين ،
والطرقات تموج بالوفود . الرايات تنحرق فى كل مكان . والموسيقى
تصيح بأ نغامها الشجية ، فتسر النفوس ، وتبهج الارواح ،
والهتاف يملأ الفضاء الفسيح ...
الباشا : عال خالص ، شايفين ! ؟

نظيرة هانم : (للباشا) شايفين إيه ؟ حأنت ياباشا عاوزنا
نشبع على الريحه ... حسرة علينا لاحصلنا بلح الشام ولا عنب
اليمين على رأى المثل !

بديع بك : ليه يعنى ؟ الواحد يغمض عينه كده ، ويسمع
كل الاحتفال ، فكأ أنه شافه تمام ، وشافه فين ؟ وهو مرتاح
فى أودته أربعة وعشرين إيراظ ... لا واحد زؤه ، ولا
واحد داس على رجله فرمها له !

الباشا : (لبديع بك) لافض فوك يا بديع يه !

بديع بك : الواحد ييثول الحأ . (سكوت)

الباشا : إنما يظهر ان الاحتفال سيكون هائل !
بديع بك : طبعاً سيكون هائل . ولكن مش حينئذ أصننا
حاجة ...

بشاير هانم : حينئذ أصننا على الأمل الزينات اللي في الشارع
زهريّة هانم : زينات إيه ؟ انت لسه عيّله ؟ الكلام دا
للنوفو الصغيرين ! ؟ ... انت طلعت فيها أوى يبشائر
(التليفون يدق ... الباشا يأخذ السماعة)

الباشا : ألو ... ألو ... ألو ... هنا منزل فضل الله باشا ...
وحضرتك تبني مين ؟ مين .. ؟ من بيت علوية هانم ؟ أعود بالله !
(نظيرة هانم وبشاير هانم تتبادلان النظرات ذات المعاني)
نظيرة هانم : (للباشا) هات ... هات السماعة ، دا مش لك .
(الباشا يعطيها السماعة)

الباشا : دا حس يسرّسع . مانا عارف ولد والّا ست ؟
نظيرة هانم : (في التليفون) أنا نظيرة ... بونجور يا حبيبتي
ازيك ؟ وازى اختك علوية هانم ؟ ... لا ماتت وليس كده ؟
الحكيم بيتول حتولد كان شويه ؟ ألقين مبروك ... بوسها
لى من خدها اليمين عشر بوسات ، ومن خدها الشمال عشره كان
الباشا : (لنفسه) اشبعنا يعني عشرة بس ؟ !

نظيرة هانم : (في التليفون) ربنا يتمتعها بالسلامة يا حبيبتي .
هي عايزاني أكون جنبها احضر الولاده ؟
الباشا : ليه انت حكيم والّا دايه ؟

نظيرة هانم : ضرورى ، ضرورى ، ضرورى؟! (تضحك)
ياسلام ، بس الباشا لوحده ...
بشاير هانم : لا ياماما مش لوحده البركة فى بديع ييه واختى
زهريّة .

نظيرة هانم : (فى التليفون) طيب حاضر ، والله ما أنا خر
علشان عيونها ، وحاجيب معاي الشنطة ، وأنا موضبه للنبي
حارسه كل حاجه ، من لفه وأماط وبزازه ... أيوه أمال ...
ناويين إذا جه ولد تسموه فضل الله باشا على اسم الباشا (تنظر
إلى الباشا) متشكرين أوى يا حبيبتي . أوفوار شيرى !
(تضع السماعة)

نظيرة هانم : (لبشاير هانم) روحى يا بشاير جيبى الشنطة
الى وضبت فيها لعلوية هانم كل الحاجات بتوع البيه
بشاير هانم : (وهى تجرى خارجة) عارفاها ياماما !
نظيرة هانم : (للباشا) حيسموه فضل الله ، على اسمك
الباشا : (مبتهجا) الحبيبة دول ناس اصحاب زوء ومعروف
نظيرة هانم : إيدك على هدية بأه نأدمها فى السبوع ...
دبوس والا ساعة ، ولا زراير أمصان ...

بديع بك : ولكن دى حاجة عجيبه ما كناش مستنيينها أبدا
زهريّة هانم : دول كانوا ييثولوا انها حتولد بعد بجمعتين
نظيرة هانم : (لزهريّة هانم) يا حبيبتي جعيتين متأدمين جعيتين
متأخرين . دأشى الواحد ما يندرشى يظبطه .

الباشا : بس إيه المعنى أنها عاوزاكي ضرورى ، ضرورى
تحضرى الولاده بتاعتها ؟!

نظيرة هانم : يادى النابية ياباشا...دى زى أختى ما حضرش
ولادتها ازاي... انت ناسى اننا تربينا سوا فى المدرسة ؟
الباشا : بس يعنى ...

نظيرة هانم : ما بسش ... دا البيت جنب البيت . خايف
من إيه كمان ؟ ...

(بشاير هانم تأتى بالحقيبة ، وهى نشيطة فرحانة)
الباشا : طيب ولزوم بشاير إيه عازره تاخديها معاكي كمان ؟
زهريّة هانم : حتى دا ما يصحش !
نظيرة هانم : ما يصحش تيجى معاى علشان نساعدهم ونوريهم
اننا ناس نادر ما مهم . مش كفايه انهم رايحين يسموا المولود
على اسم الباشا ؟ !

الباشا : (لبديع بك وزهريّة هانم) يعنى البيت حيصفف
برضه على دماغنا يا جماعة !

نظيرة هانم : ليه ؟ البركه فى الرديو ! (تقصد إلى زوجها
وتقبله) أوفوار لوله ! أوفوار لولتى ! خليك عائل . واورع
تبص من الشاباك على الستات اللى رايحه وجايه !
(الباشا يضحك . نظيرة هانم تقول لبديع بك) خلى بالك
منه يا بديع ييه !!
(الباشا يسترسل فى الضحك)

الباشا : مع السلامة ! مع السلامة ! بس معنى ابثوا بشرونا
بالمولود فضل الله باشا الصغير (ملتفتا الى زهرية هانم وزوجها)
والله ناس ولاد حلال وزوء !

(نظيرة هانم وبشاير هانم تخرجان فى عجلة)
المذيع : (فى الرديو) هنا القاهرة . سيداتى ، آنساتى ،
سادتى . نعلن بمزيد السرور أن القطار الرسمي قد قام من محطة
بنها الآن وسط هتافات يعجز اللسان عن وصفها . وقد قام
سعادة المدر وألتي كلمة وجيزة عبر بها عن شعور البنهاوين
الصادق قوبلت بعطف كبير من سمو الامير . أما النظام فعلى
غاية مايرام !

الباشا : شىء لطيف ! ... حاجة حلوة صحيح !
زهرية هانم : فرجة حاتكون كويسة أوى ...
بديع بك : بعد أربعين دئيئه الوابور حيوصل مصر !
(تسمع هتافات عالية من الخارج ، موسيقى . الباشا ينظر
من الشباك . بديع بك وزهرية هانم يقومان يتفرجان . الثلاثة
مهتمون جد الاهتمام ... تسمع هتافات تردد : (فليحي فضل
الله باشا) يدخل نعيم الفراش فى عجلة)
نعيم : سعادة الباشا ! سعادة الباشا !

الباشا : إيه ياولد !
نعيم : وقد « جمعية الفتيان المصلحين » عاوزين يثابوا
سعادتك ...

بديع بك : (متسائلا) جمعية الفتيان المصلحين ؟

الباشا : أيوه ، ماهو أنا رئيس شرف الجمعية ...

بديع بك : ربنا يخليك ياباشا !

(يتعالى الهاتف من الخارج : فليحي فضل الله باشا)

الباشا : (لنعيم) عجيبه ! طيب خليمم يتفضلوا ...

بديع بك : (لزهرية هانم) أوى انت دلواتى شويه !

(تخرج زهرية هانم . يدخل الوفد متحمسا ومعه العلم)

رئيس وفد الجمعية : (يدخل وهو يعرج لأنه شبه كسيح
تنشرف جمعية « الفتيان المصلحين » الممثلة في هذا الوفد بتقديم
تحياتها لرئيس الشرف فضل الله باشا .

الوفد : يعيش فضل الله باشا !

الباشا : متشكر يا أستاذ ... متشكر يا أساتذة !

رئيس وفد الجمعية : لقد اغتنمت الجمعية فرصة مرورها
أمام قصركم العامر ، فجاءت لتذكر سعادتكم بأن دارها ترحب
بتشريفكم لمشاهدة الموكب العظيم

بديع بك : (للباشا) هى الجمعية ...

الباشا : (لبديع بك) على ناصية شارع ابراهيم بالضبط .

رئيس وفد الجمعية : يعنى الواحد يامونشير يشوف الموكب
تحت عينه تمام !

الباشا : (واقفا يخاطب رئيس الوفد) أنا متشكر لكم خالص
ومأدر إحساساتكم ...

الوفد : يحيا التواضع ! ... يحيا التواضع ...

الباشا : ولكن بس النهارده ...

بديع بك : الباشا عاوز يثول انه مخسنتك شوية !

رئيس الوفد : لا بأس عليكم ياسعادة الباشا . ولكن دى الدنيا كلها طلعت تشوف الموكب . شىء مدهش . شىء هائل حاجة من ورا العأل ... إنها فرصة لا يسمح الدهر بمثلها ، انها ذكرى الأجيال على مر السنين ! إن الزمان بمثلها لضنين ! !

الباشا : كلام مضبوط ... بس بأ ...

بديع بك : سعادة الباشا يفضل انه يسمع الاحتفال فى الرديو

رئيس الوفد : على كل حال ، المحل لا مؤاخذه . عاوز أءول

المحل تحت أمر كم . والآن تسمح لنا بسعادتك بالخروج ! والله يمنحك الشفاء والعافية . فليحي فضل الله باشا ! ؟

(يسلم باحترام . ويخرج الوفد وهو يهتف للباشا ... زهرية

هانم تعود

الباشا : (يقول لزهرية هانم وهو يشعر بشىء من التضايق

والقلق) والنبي يا زهرية يا بنتى افتحى شباك البلكون على آخره ،

حاسس ان نفسى محبوس شوية . الظاهر ان الدنيا زمته .

(زهرية هانم تسرع إلى الشباك ، وتفتحه كله .)

المذيع : (فى الرديو) ها قد انتظمت الطوائف فى أمكتها

فى نسق جميل ، كل طائفة بأعلامها وموسيقاها ، كأنها البنيان

المرصوص قائماً على جانبي الطريق ... وهذا الحشد العظيم فى

ساحة المحطة والأوبرا وعابدين بموج كأنه البحر الزاخر .
أما الزينات فقد بلغت من التنسيق مبلغا رائعا .

الباشا : بديع ! ... بديع أوى !

زهريّة هانم : منحا يا بابا ازيك دلواقي ... برضه متألم ؟

الباشا : والله يا بنتي حاسس بأني أحسن شوية .

(تسمع من الخارج أصوات أبواق وحركة سيارات
وصياح بعض الناس . الباشا ينظر من النافذة)

الباشا : أوه ، دول جماعة يظهر را يحين المحطة

بديع بك : (ينظر) أيوه دول من الشيوخ والنواب

لابسين رسمي !

الباشا : والله حاجه تبهج النفس .

(يعود إلى جلسته وهو يتحرك قلقا . يصرخ مناديا نعيم القراش)

الباشا : يا نعيم ! ...

زهريّة هانم : عاوز حاجة يا بابا ؟

الباشا : حاجة مش مهمة يا زهريّة ... استريحى انت ...

(يصيح) يا نعيم ! يا نعيم ! الواد ده راح فين ؟ !

بديع بك : أنا أروح أندهلوك ...

(يذهب بديع بك)

المنذبح : (في الرديو) جاءتنا الساعة إشارة تليفونية بأن القطار
مر بقلوب وسط الهمّات العالى والتهلّيل الكبير . أما في العاصمة

فالموسيقى دأبة تسحر النفوس والأناشيد يرددها جماعات
الطلبة في حماس رائع ، والخطباء يلقون بقصائدهم الرنانة في
كل مكان ... فياله من يوم عظيم ! ياله من يوم عظيم !!
الباشا : (مغتبطا) ماشاء الله ، ماشاء الله !

(بديع بك يعود)

بديع بك : (للباشا) نعم مش موجود ...

الباشا : مش موجود ؟ !

بديع بك : بيتولوا راح مع الفتيان المصلحين !

الباشا : إزاي دا ؟

بديع بك : شافوه ياباشا ماشى ويام ، وعمال بهتف ...

الباشا : راح يتفرج طبعا على الموكب !

بديع بك : ما فيش حد تاني في البيت ؟

الباشا : كلهم راحو يتفرجوا على الموكب ...

زهريّة هانم : إذا كنت عاوز حاجه ماتؤلى يا بابا ؟

الباشا : تعرفى تجيبى لى بدلة التشريفه من الدولاب الكبير

اللى فى أودة التواليت ؟

(يعطيها المفاتيح)

زهريّة هانم : حاضر يا بابا !

(تخرج)

الباشا : (لبديع بك) ما ينفضوهاش أبداً ... خايف عليها

لا تعبت . هي نظيرة ولا بشاير فاضيين ؟ ما فيش عندهم غير
تلميع ضوا فرهم بابوية ، وربط شعرهم بالمشابك ، وهات يا كلام
في التليفون طول النهار !!

(زهرية هانم تأتي بالحلة . يقوم فضل الله باشا بشيء من
الصعوبة وهو يخفي آلامه . زهرية هانم تنظف الحلة ...)
بديع بك : يا سلام ... بدلة عظيمة أوى يا باشا !!
الباشا : آمال لو شفتني لا بسما تثول إيه ؟!

(تسمع أناشيد موسيقية في الخارج ، الباشا وبديع بك
وزهرية هانم ينظفون الحلة تارة ، ويصغون للموسيقى تارة
أخرى . يذهب الباشا خلف الحاجز (البرافان) ويلبس (البنطلون)
ثم يعود ...)

الباشا : بس عاوز أئسبها لحسن تكون ضاءت على ...
(تسمع هتافات من الخارج)

زهرية هانم : استنه ... استنه يا بابا ... دا فيه شرط كبير
الباشا : إيه !! طيب الحى خيطيه أوام ... !

(زهرية هانم . تبحث عن الابرة والخيط وتأتي لترتق الفتق)
المنذع (في الرديو) باق على وصول القطار عشر دقائق .
عشر دقائق فقط ... أيها المصريون هذا يومكم العظيم ، ستكتحل
عيونكم بعد قليل برؤية الموكب الفخم ... سعادة المحافظ يناشدكم
أن تحافظوا على النظام ...

الباشا : (مستهجلا زهرية هانم) لسه ماخلصيتيش ؟
زهرية هانم : خلاص ! خلاص !
(بديع بك يتأمل السيف ثم يبدأ يستله من غمده قليلا قليلا
الباشا : (لبديع بك) لا ، اوع . لحسن الشيطان شاطر !!
(الباشا يلبس السترة أمام المرأة . وبديع بك يقلده السيف .
الباشا يخطر أمام المرأة بحلة التشريفة ، ولسكنه ما يزال لا بسا
قلنسوته ومحتذيا خفه)

الباشا : (لبديع بك وزهرية هانم) إيه رأيكم ؟
(ولا يكاد يتم جملة حتى تنفرط ثلاثة أزوار من الحلة فينفتح
الصدر)

الباشا : (يصرخ) الحى يا زهرية !
(زهرية هانم تشتغل بخياطة الأزوار . الهتافات تتكرر فى
الخارج ، مختلطة بصوت المذيع)
المذيع : (فى الرديو) النظام ! النظام ! سعادة المحافظ
يناشدكم أن تحافظوا على النظام ...
الباشا : (وهو مستسلم فى شئ من المضايقة) ما تخلصى يا زهرية
زهرية هانم : أهو خلاص يا بابا !
الباشا : (لبديع بك) تفكر ان الدنيا حتباً زحمه بدرجة
ان الواحد يخاطر بنفسه لو ...
(يدخل فى هذه اللحظة عبد الغفور بك مهرولا ، وهو

لا بس الرديجوت ولكن يلاحظ أن بنطلونه من غير حالة فتراه .
دائماً يسقط ، والبك يرفعه ... عند دخول عبد الغفور بك
تغطي زهرية نصف وجهها بالخمير)

الباشا : الله ! عبد الغفور ييه ... إيه اللي جابك ؟

عبد الغفور بك : في عرضك يا باشا تسلفني حاله !

الباشا : حاله ؟ !

عبد الغفور بك : حالي ضاعت يا باشا . ولازمي واحدة
علشان اروح الاحتفال ، والظاهر ان سعادتك رايح كان !
الباشا : والله أنا بئيس البدله كده ! ...

المنيع : (في الرديو) باق على وصول الفطار بضع دقائق
عبد الغفور بك : بضع دقائق بس ؟ ... الله يلعن أبو الوخم
اللي أخّرني ... أخذتني نومه بعد الأكل حتضيع على الفرجه !
بديع بك : (لعبد الغفور بك) ولكن فرجة إيه ؟ سعادتك

رايح تنفرج ، وفايت الست بتاعتك بتولد ؟ !

عبد الغفور بك : تولد إيه ؟ ياجدع أنا قاضي للكلام الفارغ
ده ؟ ... هاتلي حالة بدل مانت آعد تهجص كده ! (يتفقد
حالة بديع بك ، ثم يقول :) انت راخر من غير حالة ؟ (للباشا)
سعادة الباشا ؟ اعمل معروف سلفني حالتك !

الباشا : حالي ؟ ازاي يا عبد الغفور ييه ؟

عبد الغفور بك : مادام مانتش رايح الاحتفال !

ألباشا : ولو ... ولكن ألى ، ولد ولا بنت ؟ (يقول ذلك وهو يلبس الحذاء)

عبد الغفور بك : إديني الحماله يا باشا ... (البنطلون يسقط دائماً ، وهو يعيده إلى مكانه)

الباشا : (وهو مشغول بانتعال الحذاء) أنا والله ممنون من العواطف الرثيئة اللى خلتكم تفكروا فى تسمية الليبيه باسمى : فضل الله !

عبد الغفور بك : أنا فكرت فى كده ؟! ياخى بس لما تولد دى لسه أدامها عشر تيام !

الباشا وبديع بك وزهرية هانم : (مدهوشين جميعا) عشر تيام ؟ !

الباشا : أ مال تدّهتو الست بتاعى ليه بالتليفون وخلتوها تطلع على ملاوشتها ، ومعها اللفف والكافولات والألمطة ؟ !
عبد الغفور بك : احنا ندهنا نظيرة هانم ؟ !

بديع بك (لعبد الغفور بك) يمكن تكون سعادتك لسه تحت تأثير النوم ... الهوانم هنا راحوا عندكم علشان يحضروا الولادة .

عبد الغفور بك : ولادة إيه يا جدع ؟ دى الست بتاعى طاعت من البيت أدام عيني بآلها ربع ساعة علشان تنفّرج على الموكب !

الباشا : آه ... بأ المسألة !... الله يجازيك يا ولد يا صفر ...
والله العظيم لأورك !

المنذيع : (في الرديو) القطار الرسمي يدخل المحطة الآن ،
مزدانا بالأعلام والزهور . إنه يخترق صفوف المستقبليين وسط
الهمتاف والتهليل .

(عيل إصبر عبد الغفور بك ، فحذب حمالة الباشا ليضعها في بنطلونه)
الباشا : يا جدها هات الحمالة (ينزعها من عبد الغفور بك ،
ويحاول وضعها ثانيا في بنطلونه)

الباشا : (عبد الغفور بك ينزعها منه مرة أخرى) هات
يا شيخ بلا كلام قارغ !

(الباشا يمسك طرف الحمالة ، وعبد الغفور بك يمسك الطرف
الآخر ، كل منهما يجذب ، تنقطع الحمالة نصفين .)

المنذيع : (في الرديو) وقف القطار على الرصيف . الموسيق
تعزف النشيد الملكي . بعد الانتهاء من النشيد يقفش الأمير
قره قول الشرف على الرصيف ...

(الباشا وعبد الغفور بك يقفان كأنهما ديكان يتأهبان
للعراك ، ينظر كل منهما إلى نصف الحمالة في يده ، ثم يسرع
عبد الغفور بك فيحزم نفسه بقطعته ، ويفعل مثله الباشا . يخرج
عبد الغفور بك مهرولا)

عبد الغفور بك : أبأ حصلني على المحطة !

(الباشا يتردد لحظة ، ثم يهرول خلفه ، وهو لم يتم ربط
حذائه ، وما تزال القلنسوة على رأسه ، يتعثّر في السيف ويكاد يسقط)
الباشا : أنا وراك !!

(في هذه اللحظة يسمع الهتاف من الخارج ، مختلطا بصوت
لموسيقى ، والردىو ينصح للجمنهور بالتزام النظام)
بديع بك : (يراقب الباشا في ذهول ، وهو يهرش رأسه ،
يبادل زهرية هائم النظرات ، ويقفز جاريا نحو الباب ، ويصيح
بزوجته :) الله ؟ ! اشمعنا احنا ؟ حصلينى أوامك . . . بس
أوعى تنسى البرؤع !!

ستار الختام

تحت الطبع للمؤلف

قال الراوى

نخبة من القصص للنشء والأسرة

بنت الشيطان

وقصص أخرى



المطبوع للمؤلف :

١ — في العربية :

الوثبة الأولى

الحاج شلي

أبو علي عامل أرتيست

الأنطال

الشيخ عفا الله

قلب غانية

فرعون الصغير

نداء المجهول . (من منشورات دار المكشوف ببيروت)

مكتوب على الجبين

نشوء القصة وتطورها

ثلاث مسرحيات : الصعلوك . أبو شوشه . الموكب .

ب — في الفرنسية :

غراميات سامي

Les Amours de Sami

Les ecrivains Contemporains 26 Rue des Tournelles

Paris 1Ve.

٢ — في الألمانية :

مجموعة قصص (اختارها وترجمها المشرق السويصري

الدكتور ويدمار)

Mahmūd Taimūr

von Dr. G. Widmer

Arther Collignon, Buch handlung für Kunst

und Wissenschaft G. m. b. H. — Berlin N W 7

هذا الكتاب هو احدى هدايا

العدد الشهري الممتاز
سبوعية «الحوادث»

يقدم مجاناً

مع كتاب آخر من الكتب الثلاثة الآتية :

- ١) خفايا الحرب الحاضرة — بقلم الأستاذ محمد خطاب بك
- ٢) أمريكا كما عرفتها — « » على اسماعيل بك
- ٣) ثلاثون يوماً في بلاد ابن سعود — بقلم الأستاذ محمد حمدي


لكل مشترك داخل القطر يسدد اشتراكه عن سنة كاملة

وقيمة الاشتراك مع الهدايا ٢٥ قرشا فقط !!!

والعدد الشهري الذي تصدره جريدة «الحوادث» جاء
كل مثقف - ومثقف - يرغب في قراءة أوفى المعلومات ، و
عن أحدث الموضوعات التي تشغل بال العلماء والباحثين في
أولا بأول . كما أن كل عدد يحتوي على « يوميات
سجل شهري مصور لتاريخ الحرب في كل شهر ،
الحرب بقلم ودراية .

ترسل الاشتراكات بالعنوان الآتي : جريدة الحوادث
الشهري - قسم الاشتراكات ، شارع الطوابة باب الخ

Bibliotheca Alexandrina



0420045